

摘藻堂四庫全書薈要

集部

欽定四庫全書薈要卷一萬四千九百七十七

集部

施註蘇詩卷二十六

宋 蘇軾 撰

宋 施元之 註

武進邵長蘅刪補

詩四十九首

時官翰林作
施註缺今補

書晁補之所藏文與可畫竹三首

與可畫竹時見竹不見人豈獨不見人嗒然遺其身其身與竹化無窮出清新莊周世無有誰知此凝神

莊子達生篇用志
不分乃凝於神

若人今已無此竹寧復有那將春蚓筆畫作風中柳君
看斷崖上瘦節蛟虵走何時此霜竿復入江湖手

隋書楊素戲柳調曰柳條通體弱獨搖不
禁風白樂天畫竹歌蕭蕭畫莖瘦節節疎

晁子拙生事舉家聞食粥朝來又絕倒諛墓得霜竹可
憐先生槃朝日照苜蓿吾詩固云爾可使食無肉

公自注吾

舊詩云可使食無
肉不可使居無竹

首二句用魯公乞米帖語屢見世說衛玠談道平子絕
倒唐韓愈傳劉叉者亦節士持愈數斤金去曰此諛墓

中人得者不若與劉君為壽苜蓿
槃詳第四卷和子由詩注屢見

戲用晁補之韻

昔我嘗陪醉翁醉今君但吟詩老詩清詩咀嚼那得飽
瘦竹瀟灑令人饑試問鳳凰饑食竹何如駕馬肥苜蓿
知君忍饑空誦詩口頰瀾翻如布穀

王注醉翁歐陽永叔也詩老梅聖俞也莊子秋水篇鵜
鷃非梧桐不止非練實不食注練實竹實也本草苜蓿
出西域漢大宛列傳馬嗜苜蓿漢使取其實來于是天
子始種苜蓿又杜子美詩宛馬總肥春苜蓿布穀瀾翻
見注已

書皇親扇

十年江海寄浮沉
夢遶江南黃葦林
誰謂風流貴公子
筆端還有五湖心

唐人題韓信廟詩
隆準蚤知同烏喙
將軍應有五湖心

書李世南所畫秋景二首

野水參差落漲痕
疎林欹倒出霜根
扁舟一棹歸何處
家在江南黃葉村

人間斤斧日創夷
誰見龍蛇百尺姿
不是溪山曾獨往

何人解作挂猿枝

創夷瘡痍同後漢書命軍吏察夷傷注金瘡曰夷李白詩山光搖積雪猿影挂寒枝

書鄆陵王主簿所畫折枝二首

論畫以形似見與兒童鄰賦詩必此詩定非知詩人詩
畫本一律天工與清新邊鸞雀寫生趙昌花傳神如何
此兩幅疎澹含精勻誰言一點紅解寄無邊春

劉翹文心雕龍文章有形似之語畫鑑唐人花鳥邊鸞
最為馳譽段成式詩活禽生卉推邊鸞趙昌見二十三
卷王伯敷藏趙昌花詩注

瘦竹如幽人幽花如處女低昂枝上雀搖蕩花間雨雙
翎決將起衆葉紛自舉可憐採花蜂清蜜寄兩股若人
富天巧春色入毫楮懸知君能詩寄聲求妙語

莊子逍遙遊蜩與鸞鳩笑之曰我決起而
飛搶榆枋漢賈捐之傳君房言語妙天下

人
昨見韓丞相言王定國今日玉堂獨坐有懷其

晝卧玉堂上微風舉輕紈銅餅下碧井百尺鳴飛瀾
仰清夢餘愛此一掬寒似予平生友苦語涼肺肝秀眉

玉兩頰矯矯如翔鸞置之江淮交清詩洗江湍紅鱗對
白酒信美非所安丞相功業成還家酒杯寬人間有此
客折簡呼不難相將扣東閣起舞盡餘歡

韓退之憶昨行危
詞苦語感我耳

和張耒高麗松扇

張耒字文潛淮陰人
蘇門四學士之一

可憐堂上十八公老死不入光明

一作明光

宮萬牛不來難

自獻裁作團團手中扇屈身蒙垢君一洗挂名君家詩
集裏猶勝漢宮悲婕妤好網蟲不見乘鸞子

會稽錄丁固夢松生腹上有解之者曰松字十八公也後十八年果為三公三輔故事桂宮中有光明殿班婕妤好怨歌行新裂齊紈扇皎潔如霜雪裁成合歡扇團圓似明月江文通擬班婕妤詩紈扇如圓月出自機中素畫作秦王女乘鸞向煙霧劉禹錫團扇歌秋風入庭樹從此不相見上有乘鸞女蒼蒼網蟲遍先生詩蓋參錯三詩之意也

故李誠之待制六丈挽詞

青青一寸松中有樑棟
姿天驥墮地走萬里端可期
世無阿房宮下建五丈旗
又無穆天子西征燕瑤池
才大古難用老死亦其宜
丈夫恐不免豈患莫已知
公如松

與驥少小稱偉奇俯仰自廊廟笑談無羌夷清朝竟不
用白首仍憂時願斬橫行將請烹乾沒兒言雖不見省
坐折姦雄窺嗟我去公久江湖生白髭歸來耆舊盡零
落存者誰比公嵇中散龍性不可羈疑公李北海慷慨
多雄詞淒涼五君詠沉痛八哀詩邪正久乃明人今屬
公思九原不可作千古有餘悲

秦始皇本紀作前殿阿房上可以坐萬人下可以建五
丈旗再見劉子穆王肆意遠遊命駕八駿之乘升崑崙
之丘遂賓于西王母觴于瑤池之上一日行萬里史記
季布列傳樊噲曰臣願得十萬衆橫行匈奴中季布曰

噲可斬也夫高帝將兵四十餘萬衆困於平城今噲奈
何以十萬衆橫行匈奴中漢食貨志烹弘羊天乃雨詳
見十九卷魚蠻子詩注又張湯始為小吏乾沒與長安
富賈田甲魚翁叔之屬交私魏畧文帝與元城令吳質
書徐陳應劉一時俱逝何圖數年之間零落畧盡言之
傷心顏延年五君詠謂阮籍嵇康劉伶咸向秀也其
詠嵇康云驚翮有時鍛龍性誰能馴杜子美八哀詩謂
王思禮李光弼嚴武汝陽王璿李邕蘇源明鄭虔張九
齡也李邕詩云憶昔李公存詞林有根抵聲華當健筆
灑落富清製李邕嘗為北海太守禮記趙文子與叔譽
觀乎九原文子曰死者如可作也吾誰與歸

次韻孔常父送張天覺河東提刑

送君應典鵲鵲表憑仗千鍾洗別愁脫帽風流餘長史

公自注君喜草書而不工故以此為戲
理輪家世本留侯公自注張綱子房七世孫也捷

為武陽人墓在今彭山君豈其後邪
子河駿馬方爭出公自注麟府馬出子河泌昭義

疲兵得少休公自注唐福昭義步兵蓋澤潞弓箭手
定向秋山得嘉句故

關黃葉滿行舟

西京雜記司馬相如初與卓文君還成都居貧愁懣以所著鸛鵲裘貫酒為歡長史張旭也杜子美飲中八仙歌云張旭三杯草聖傳脫帽露頂王公前王注故闕即河東古關唐李端古別離詩水國黃時洞庭霜落夜行舟聞商賈宿在楓林下此地送君還茫茫似夢間

送張天覺得山字

西登太行嶺北望清涼山晴空浮五髻
晝靄卿雲間餘光入巖石神草出茅管
何人相指似稍稍落人寰能令墜指兒
虬髯茁冰顏祝君如此草為民已痼瘵
我亦老且病眼花腰腳頑念當勤致此
莫作河東慳

山志太行山在澤州晉中縣五臺山一名清涼山史記天官書若煙非煙若雲非雲郁郁紛紛蕭索輪囷是謂卿雲劉禹錫詩金毛五髻卿雲間詳見二十五卷武昌西山注山志山中有圓光不次呈現詩小雅露彼菅茅王注五臺山有草藥名長松亦名仙茆時有患風疾者入山遇異僧授此草服之兩眉再生疾遂愈

次韻王定國倅揚州

此身江海寄天游一落紅塵不易收未許相如還蜀道
容教何遜在揚州又驚白酒催黃菊尚喜朱顏映黑頭
火急著書千古事虞卿應未厭窮愁

司馬相如傳建節往使西南夷至蜀太守以下郊迎縣
令負弩矢先驅蜀人以為寵杜註何遜作揚州法曹廨
舍有梅花盛開遜吟詠其下後居洛思梅花再請其任
從之抵揚州花方盛遜對花徬徨終日史記平原君傳
虞卿非窮愁亦不能著書以自見于後世云

贈李道士并引

駕部員外郎李宗君固景祐中良吏也守漢州有

道士尹可元精練善畫以遺火得罪當死君緩其
獄會赦獲免時可元八十一自誓且死必為李氏
子以報可元既死二十餘年而君子世昌之婦夢
可元入其室生子曰得柔小名蜀孫幼而善畫既
長讀莊老喜之遂為道士賜號妙應事母以孝謹
聞其寫真蓋妙絕一時云

世人只數曹將軍誰知虎頭非癡人腰間大羽何足道
頰上三毛自有神平生狎侮諸公子戲著幼輿巖石裏

故教世世作黃冠布襪青鞋弄雲水千年鼻祖守關門
一念還為李耳孫香火舊緣何日盡丹青餘習至今存
五十之年初過二袁顏記我今如此他時要指集賢人

知是香山老居士

公自注樂天為翰林學士奉詔寫真集賢院

張彥遠名畫記曹霸魏髦之後天寶末每詔寫御馬及功臣官至左武衛將軍再見又顧愷之小字虎頭丹青妙絕一時俗傳虎頭三絕畫絕癡絕才絕互見第五卷寄荅老詩注杜子美丹青引良相頭上進賢冠猛將腰間大羽箭晉顧愷之傳嘗圖裴楷象頰上加三毛覺神明殊勝又為謝鯤象在石巖裏云此子宜置丘壑中幼興謝鯤字再見唐書李播棄隋為道士號黃冠子杜子美山水障歌青鞋布襪從此始楊雄反騷或鼻祖于汾

隅劉德注鼻始也闕令內傳闕令尹喜登樓四望見東極有紫氣西邁曰應有聖人經過至期齋戒守闕果見老子一念用楊妃外傳語見第十四卷芙蓉城詩注史記老子列傳姓李名耳為周守藏室史王注鼻祖指尹喜李耳指老聃按李道士前生姓尹後為李氏子而皆為道士故用尹喜老聃事通言之孔融與曹公書五十之年融又過二白樂天詩昔作少學士圖形入集賢今為老居士寫貌寄香山

次韻張舜民自御史出倅虢州留別

舜民字雲叟元豐辛

酉為環慶師屬明年責監郴州酒稅尋以年勞賜五品服元祐初還朝赴試玉堂按郴屬湖湘故曰湘纍又賜服赴試故有給札佩銀之語

玉堂給札氣如雲初起湘纍復佩銀樊口淒涼已陳迹

公自注昔與張同遊武昌樊口來詩中及之

班心突兀見長身

公自注臺吏謂御史立處

為班心

江湖前日真成夢鄠杜他年恐卜鄰此去若容陪

坐嘯故應客主盡詩人

漢司馬相如列傳請為天子遊獵之賦上令尚書給筆札又相如既奏大人賦天子大說飄飄有凌雲氣雄反駁因江潭而注記今欽弔楚之湘纍注不以罪死曰纍注往也長身注屢見地里志鄠杜二縣名屬長安

次韻米黻二王書跋尾二首

三館曝書防蠹毀得見來禽與青李秋蛇春蚓久相雜
野鷺家雞定誰美玉函金籀上天來紫衣敕使親臨啟

紛綸過眼未易識磊落挂壁空雲委歸來妙意獨追求
坐想蓬山二十秋怪君何處得此本上有桓玄寒具油
巧偷豪奪古來有一笑誰似癡虎頭君不見長安永寧
里王家破垣誰復修

職畧宋以昭文集賢史館為三館皆寓崇文院尚書故
實王內史有來禽青李帖秋地春蚓野鶯家雞注屢見
漢武內傳封以白玉之函黃庭經玉匙金籥常完堅後
漢逸民傳井丹善談五經京師語曰五經紛綸井大春
晉謝靈運傳比響聯辭波屬雲委王子年拾遺記海中
三神山二曰蓬壺即蓬萊山也續晉陽秋桓玄好蓄法
書名畫客至常出而觀客食寒具油汙其畫後遂不設
寒具集韻寒具餠餅也晉顧愷之傳嘗以一廚畫寄桓

方玄發其廚後竊取之愷之見封題如初但失其畫直云妙畫通靈變化而去猶人之登仙了無怪色唐王淮傳居永寧里法帖名畫以厚貲鉤取鑒垣納之及被誅所藏書畫悉為人破取

元章作書日千紙平生自苦誰與美畫地為餅未必似要令癡兒出饒水錦囊玉軸來無趾粲然奪真疑聖智忍饑看書淚如洗至今魯公餘乞米

三國盧毓傳文帝詔曰選舉莫取有名名如畫地作餅不可啖也歐陽永叔詩盛以錦囊裝玉軸孔融與曹公書珠玉無蹊而自至者人好之也乞米魯公帖屢見

次韻宋肇惠澄心紙二首

詩文發源澄心堂紙乃江南李後主製劉

貢父詩云當時百金售一幅澄心堂中千
萬軸後人聞此那復得就使得之當不識

詩老囊空一不留百番曾作百金收

公自注永叔以澄心百幅遺聖俞聖

俞有知君也要雕肝腎分我江南數斛愁

庾亮賦且將一寸心能容萬斛愁王注澄心紙江南李後主製故曰江南數斛愁韓退之詩不用雕琢愁肝腎

君家家學陋相如宜與諸儒論石渠古紙無多且分我

自應給札奏新書

王注宋肇蓋子京家子京好為險澀之語故言其家學陋相如也漢儒林列傳甘露中施讐與五經諸儒雜論同異于石渠閣三國魏武帝本紀諸將征伐皆以新書從事再見

郭熙秋山平遠二首

郭熙秋山平遠見二十五卷題注

目盡孤鴻落照邊
遙知風雨不同川
此間有句無人識
送與襄陽孟浩然

杜子美詩復憶襄陽孟浩然新詩句句盡堪傳再見

木落騷人已怨秋
不堪平遠發詩愁
要看萬壑爭流處
他日終煩顧虎頭

李白詩昨夜秋聲闌闌來洞庭木落騷人哀晉顧愷之傳人問會稽山水之狀愷之云千巖競秀萬壑爭流

送歐陽辯監澶州酒

汗血駕鼓車何從致千里紛紛糟麴間欲試賢公子君
家江南英濯足滄浪水卻渡舊黃河漲沙埋馬耳由來
付造物倚伏何窮已當念楚子文三仕無愠喜

史記大宛列傳大宛多善馬馬汗血東觀漢記
光武時名都王國有獻名馬者帝以馬駕鼓車

九月十五日邇英講論語終篇賜執政講讀史

官燕于東宮又遣中使就賜御書詩各一首臣

軾得紫薇花絕句其詞云絲綸閣下文章靜鐘

鼓樓中刻漏長獨坐黃昏誰是伴紫薇花對紫

微郎翌日各以表謝又進詩一篇臣軾詩云

通鑑

元祐二年秋宴近臣於資善堂出所書唐人詩分賜按年譜先生以元祐元年自中書舍人為翰林學士知制誥二年兼侍讀通典唐置中書舍人六人其內一人知制誥天寶元年改中書為紫微省舍人曰紫微郎羣芳譜紫薇花小而叢其色紫一名木槿

繡裳畫袞雲垂地不作成王剪桐戲日高黃繖下西清

風動槐龍舞交翠

公自注邇英閣前有雙槐膠然屬地如龍形

壁中蠹簡今

千年漆書科斗光射天諸儒不復憂吻燥東宮賜酒如

流泉酒酣復拜千金賜一紙驚鸞回鳳字蒼顏白髮便

生光袖有驪珠三十四

公自注臣所賜書并題目及臣姓名凡三十四字

歸來

車馬已喧闐爭看銀鉤墨色鮮人間一日傳萬口喜見

雲章第一篇

公自注上前此未嘗以御書賜羣臣

玉堂書掩文書靜鈴索

不搖鐘漏永莫言弄筆數行書須信時平由主聖犬羊

散盡沙漠空捷烽夜到甘泉宮似聞指揮築上郡已覺

談笑無西戎

公自注時熙河新獲鬼章是日涇原復奏夏賊數十萬人遁去

文思天子

師文母終閉玉關辭馬武小臣願對紫薇花試草尺書

招贊普

公自注按唐制翰林學士帶知制誥許綬中書舍人班今臣以知制誥待罪禁林故得以紫薇

為故
事

詩國風哀衣繡裳史記晉世家成王與叔虞戲削桐葉
為圭與之曰以此封若史佚請擇日立叔虞曰天子無
戲言楊雄賦攬擢流於高光兮溶方皇於西清漢書魯
恭王壞孔子舊宅於其壁中得古文經傳後漢書杜林
於西州得漆書古文尚書一卷科斗即壞宅所得也陸
機文賦始躑躅於燥吻壯子美詩不有小舟能盪槩百
壺那送酒如泉索靖草書狀婉若銀鈎飄若驚鷺王羲
之草書勢婆娑而同鳳舞韓退之詩遺我明珠九十六
寒光照骨映驪目戎幕閑話翰林院有懸鈴以備中夜
警急文書出入則引索以代呼唐書長慶中河北用兵
翰林院鈴索自鳴與軍事緩急相應韓偓詩夜久忽聞
鈴索動玉堂西畔響丁東杜子美詩捷書夜報清晝同
三輔黃圖甘泉宮在池陽縣西去長安二百里史記崇
恬列傳北逐夷狄收河南築長城居上郡書堯典欽明

文思安安唐杜牧之詩文思天子復河湟詩周頌亦右
文母按文母指太皇太后也後漢臧宮傳時匈奴饑疫
宮與楊虛侯馬武上書願得五千騎以立功詔辭不許
又范曄論光武開玉門以謝西域之質後漢西域傳建
武二十一年西域十八國遣子入侍天子皆還其侍子
一說志玉門關在沙州魏收詩尺書徵建鄴杜子美詩
敕書憐贊普注
贊普吐番君號

和王晉卿并引

元豐二年予得罪貶黃州而駙馬都尉王誥亦坐
累遠謫不相聞者七年予既召用而誥亦還朝相
見殿門外感歎之餘作詩相屬詞雖不甚工然託

物悲慨厄窮而不怨泰而不驕憐其貴公子有志
如此故和其韻欲使詵姓名附見予詩集中然亦
不以示詵也詵字晉卿功臣全斌之後云

宋史全斌太原

人贈中書令

先生飲東坡獨舞無所屬當時挹明月對影三人足醉
眠草棘間蟲虺莫予毒醒來送歸鴈一寄千里目悵然
懷公子旅食久不玉欲書加食字遠託西飛鵠謂言相
濡沫未足救溝瀆吾生如寄耳何者為禍福不如兩相

忘昨夢那可逐上書得自便歸老湖山曲躬耕二頃田
自種十年木豈知垂老眼對此金蓮燭公子亦生還仍
分刺史竹賢愚有定分尊俎守尸祝文章何足云執技
等醫卜朝廷方西顧羌鹵驕未伏遙知重陽酒白羽落
黃菊羨君真將家浮面氣可掬何當請長纓一戰河湟
復

史記魏其武安侯列傳夫起舞屬丞相唐詩欲窮千里
目更上一層樓杜子美詩旅食京華春尚書惟辟玉食
又晉王濟傳濟麗服玉食按濟為晉駙馬則於晉卿用
之宜矣古樂府上有加飡食王注公自黃量移汝州表

乞常州居住詔許之唐令狐綯傳為學士承旨夜對禁
中撤金蓮花炬送還院按先生時為學士嘗召對便殿
宣仁撤御前金蓮燭送歸院或即自述其事歟莊子逍
遙遊庖人雖不治庖尸祝不越樽俎而代之矣漢司馬
遷傳文史星歷近乎卜祝之間李白九日登巴陵置酒
望洞庭水軍詩白羽落酒樽唐書袁天綱傳見竇軌曰
君方語氣浮入于大宅若將必多殺人願自戒漢書終
軍傳願請長纓以羈南越王而致之闕下復河湟見本
卷九月十五日詩注

謝王澤州寄長松兼簡張天覺二首

莫道長松浪得名能教覆額兩睂青
便將徑寸同千尺知有奇功似伏苓

長松五臺山神草詳見本卷送張天覺詩註抱朴子松脂入地千年變為茯苓神仙傳秀省公餌茯苓得仙

憑君說與埋輪使速寄長松作解嘲

公自注張天覺詩有理及河東慳之

語無復青黏和漆葉枉將鍾乳敵仙茅

漢揚雄傳或嘲以玄尚白而雄解之作解嘲三國華佗傳樊阿從佗求可服食益於人者佗授以漆葉青黏散注青黏一名地尸一名黃芝黏女廉反本草千斤鍾乳不若一斤仙茅

次韻劉貢父所和韓康公憶持國二首

夢覺真同鹿覆蕉相君脫屣自參寥顏紅底事髮先白
室邇何妨人自遙狂似次公應未怪醉推東閣不須招

援毫欲作衣冠表盛事終當繼八蕭

列子鄭人有薪於野者過駭鹿擊而斃之藏諸隍中覆之以蕉俄而遺其所藏之處遂以為夢順塗而詠其事傍有聞者用其言而取之薪者歸其夜真夢藏之之處又夢得之之主案所夢而尋得之遂訟而爭之歸之士師士師請二分之以聞鄭君鄭君曰士師將復夢分人鹿耶相君字出史記范睢傳莊子大宗師玄冥聞之參寥唐書蕭氏自瑀至遇八葉宰相名德相望與唐盛衰世有衣冠盛事圖

開戶端居念獨深小軒朱檻憶同臨燎鬚誰識英公意黃髮聊知子建心已託西風傳絕唱且邀明月伴孤斟他時內集應呼我下客先拚醉墮簪

史記陸賈傳陳平嘗燕居深念陸生往請直入坐而陳丞相方深念不時見陸生陸生曰何念之深也唐李勣傳妙蚤寡有疾自為煮粥火燎其鬚曰吾與婦皆老矣能幾進之勣封英國公曹子建別白馬王彪詩王其愛玉體俱享黃髮期

次韻劉貢父叔姪扈駕

玉堂孤坐不勝清長羨枚鄒接長卿只許隔牆聞置酒時因議事得聯名機雲似我多遺俗廣受如君不治生共託屬車塵土後釣天一飽夢中榮

司馬相如傳是時梁孝王來朝從鄒陽枚乘之徒相如見而說之因病免客遊梁得與諸侯遊士居杜子美詩

隔屋喚西家。借問有酒不牆頭。過濁醪展席俯長流。漢
疏廣傳廣為太傅兄子受為少傅俱移病歸子孫竊謂
其昆弟老人勸說君買田宅廣曰賢而多財損其志愚
而多財益其過。漢司馬相如傳犯屬車之清塵應劭注
大駕屬車八十一乘史記趙世家簡子夢與百神遊於
鈞天廣樂九奏萬舞不似三代之樂其聲動人心韓退
之詩雖得一餉樂

次韻韓康公置酒見留

庭下黃花一醉同。重來雪嶽已穹窿。不應屢被譏安石
但使無多酌。次公鍾乳金釵人似玉。鵲絃鐵撥坐生風
少卿尚有車茵在。願覺寬容勝弱翁。

晉謝安傳字安石於土山營墅樓館林竹甚盛每攜中外子姪往來遊集肴饌亦屢費百金世頗以此譏焉而安殊不以屑意白樂天戲贈牛僧孺詩鍾乳三千兩金釵十二行鵝絃鐵撥注屢見漢書丙吉字少卿車茵見第三卷廣陵三同舍詩注又魏相字弱翁為人嚴毅不如吉寬

次韻王都尉偶得耳疾

君知六鑿皆為贅我有一言能決疣病客巧聞牀下蟻
癡人強覩棘端猴聰明不在根塵裏藥餌空為婢僕憂
但試周郎看聾否曲音小誤已回頭

莊子大宗師彼以生為附贅懸疣以死為決疣潰癰韓
子燕王好伎巧而人妄進曰臣能於棘刺之端造母猴

三國吳周瑜傳精意于音樂雖三爵之後其有闕
誤瑜必知之知之必顧故時謠曰曲有誤周郎顧

送喬全寄賀君六首并引

舊聞靖長官賀水部皆唐末五代人得道不死章
聖皇帝東封有謁於道左者其謁云晉水部員外
郎賀亢再拜而去上不知也已而閱謁見之大驚
物色求之不可得天聖初又使其弟子喻澄者詣
闕進佛道像直數千萬張公安道與澄遊具得其
事又有喬全者少得大風疾幾死賀使學道今年

八十益壯盛人無復見賀者而全數見之元祐二年十二月全來京師十許日予留之不可曰賀以上元期我於蒙山又曰吾師嘗遊密州識君於常山道上意若喜君者作是詩以送之且作五絕句

以寄賀

靖長官見十二卷送范景仁遊洛中詩注

君年二十美且都初得惡疾墮眉須紅顏白髮驚妻孥覽鏡自嫌欲棄軀結茅窮山啖松腴路逢逃秦博士盧方瞳照野清而癯再拜未起煩一呼覺知此身了非吾

炯然蓮花出泥塗隨師東遊渡維却山頭見我兩輪朱
豈知仙人混屠沽爾來八十胸垂胡上山如飛嗔人扶
東歸有約不敢渝新年當參老仙儒秋風西來下雙鳧
得棗如瓜分我無

詩國風洵美且都抱朴子上黨趙瞿者病癰垂死其家
乃送之山穴中有仙人行過穴口以囊藥賜之瞿服百
許日瘡愈顏色豐悅肌膚玉澤仙人曰此是松脂耳列
仙傳盧敖為秦始皇博士使求神仙一去不返互見第
五卷盧敖洞詩注王子年拾遺記老聃居山有父老五
人方瞳玉面握清筠杖共談天地及五行之精列仙傳
偓佺兩瞳更方維却密州二水名禰衡傳欲使我從屠
沽兒輩也詩國風狼跋其胡注頷下懸肉也杜子美詩

上馬不用扶
每扶必怒嗔

生長兵間蚤脫身晚為元祐太平人不驚渤澥桑田變
來看龜蒙漏澤春

後漢光武紀生長兵間久厭武事柳子厚與蕭俛書朝
夕歌謠使成文章雖不得位亦不虛為太平之人也太平
廣記王遠傳麻姑云接待已來東海三為桑田詩魯頌
奄有龜蒙山志龜山在兗州泗水縣蒙山在沂州費縣
寰宇記兗州泗水縣東北漏澤穴有五皆深
二丈每春夏積水秋冬不過三日水皆盡

曾謁東封玉輅塵幅巾短褐亦逡巡行宮夜奏空名姓
悵望雲霞縹緲人

周禮王之五輅一曰玉輅又車宮
軒門帷宮旌門注天子行宮也

垂老區區豈為身微言一發重千鈞始知不見高皇帝
正似商山四老人

王注一發謂四皓對
高祖太子仁孝之語

舊聞父老晉郎官已作飛騰變化看聞道東蒙有居處
願供薪水看燒丹

東蒙即蒙山一名東山南史陶潛傳送一力給其子曰
今遣此力助汝薪水之勞抱朴子金丹燒之愈久變化
愈妙食之令人不老不死

千古風流賀季真
最憐嗜酒謫仙人
狂吟醉舞知無益
粟飯藜羹問養神

李白憶賀監詩四明有狂客風流賀季真長安一相見呼我謫仙人再見莊子刻意篇此養神之道也

送家安國教授歸成都

家安國字復禮眉山人博學舉進士不第後隨

韓存實征乞第得官既而諸公舉之得成都教授故詩內有說劍橫經鋒鎗腥編簡香之句

別君二十載坐失兩鬢青
吾道雖艱難斯文終典刑
屢作退飛鷁羞看乾死螢
一落戎馬間五見霜葉零
夜談

空說劍春夢猶橫經新科復舊貫童子方乞靈須煩凌
雲手去作入蜀星蒼苔高朕室古柏文翁庭初聞編簡
香稍覺鋒鏑腥岷峨有雛鳳梧竹養脩翎嗚呼應嶰律
飛舞集虞廷吾儕便歸老亦足慰餘齡

杜子美詩案頭乾死讀書螢莊子有說劍篇按通鑑元
祐二年詔毋用王氏經義從呂公著請復制科詩中新
科復舊貫指此後漢李郃傳和帝遣使徵服單行觀采
風謠二使當到益部李郃指星云有二使星入益州分
野高朕見第五卷監試呈同官詩注王注高朕室今府
學古室文翁庭今有古柏處呂氏春秋黃帝使伶倫截
嶰谷竹制十二竽聽鳳凰之鳴以為律呂

和子由除夜元日省宿致齋三首

按除夜元祐二年丁卯元

日三年
戊辰也

江湖流落豈關天禁宿相望亦偶然等是新年未相見
此身應坐不歸田

白髮蒼顏五十三家人遙遣試春衫朝回兩袖天香滿
頭上銀幡笑阿咸

杜子美詩朝罷香煙攜滿袖杜子美杜位宅
守歲詩守歲阿咸家王注銀幡元日所賜者

當年踏月走東風坐看春闈鏢醉翁白髮門生幾人在

卻將新句調兒童

次韻答張天覺二首

車輕馬穩轡銜堅但有蚊虻喜撲緣截斷口前君莫問
人間差樂勝巢仙

列子齊輯乎轡銜之際蚊虻撲緣出莊子屢見李習小
傳人間差樂不苦也韓退之記夢詩口前截斷第二句
綽虐顧我類不歡乃知神仙未賢聖護短憑愚
邀我敬我寧屈曲身世間安能從汝巢神仙

馭風騎氣我何勞且要長松作土毛亦如訶佛丹霞老
卻向清涼禮白毫

傳燈錄丹霞禪師過慧林寺遇天大寒師取木佛燒火
院主訶之師以杖子撥灰曰吾燒取舍利主曰木佛何
有舍利師曰既無舍利更取兩尊來燒院主自後者須
墮落王注張天覺為河東提刑行部至五臺山游清涼
山時有神光也法華經世尊于靈山會上為諸大衆
說二十八品放耆闍白毫相光照三千大千世界

次韻黃魯直畫馬試院中作

按年譜先生以元祐三年戊辰任翰

林學士知貢舉

少年鞍馬勤遠行卧聞斷草風雨聲見此忽思短策橫
十年髀肉磨欲透那更陪君作詩瘦不如芋魁歸飯豆
門前欲嘶御史驄詔恩三日休老翁美君懷中雙橋紅

公自注黃
有老母

杜子美韋僊畫馬歌一匹斲草一匹嘶又詩知君苦思
綠詩瘦芋壯飯豆注屢見後漢桓典傳拜侍御史是時
宦官秉權典執政無所回避嘗乘驄馬京師畏憚為之
語曰行行且止避驄馬御史宋故事省試官出院給假
三日吳志陸績見袁術術出橘績懷三枚去拜辭墮
地術謂曰陸郎作賓客而懷橘乎答曰欲歸遺母

余與李廌方叔相知久矣領貢舉事而李不得

第愧甚作詩送之

廌陽翟人少以文字見蘇子瞻子瞻喜之及知舉廌適就

試意在必得廌以冠多士及考章程文大喜以為廌無疑遂以為魁既拆號悵然出院以

詩送廌

與君相從非一日筆勢翩翩疑可識平生謾說古戰場
過眼終迷日五色我慙不出君大笑行止皆天子何責
青袍白紵五十人知子無怨亦無德買羊沽酒謝玉川

為我醉倒春風前歸家但草凌雲賦我相夫子非臞仙

唐李華傳嘗擬作弔古戰場文極意研確他日與蕭穎士讀之問誰可及荅曰君加精思便能至矣華愕然信服李肇國史補唐李程貞觀中試日五色賦破云德動天鑒祥開日華楊於陵覽之曰須作狀頭翌日無名於陵攜示主文曰場中有此侍郎何以待之曰非狀元不可於陵曰若如此侍郎已遺賢矣亟命取李程卷對之不差一字遂擢第一左傳成二年知罃對楚王曰無怨無德不知所報韓退之寄玉川子詩買羊酤酒謝不敏

再見又紅芍藥歌花前醉倒歌者誰楚狂小子韓退之漢司馬相如傳列仙之儒居山澤間形容甚臞

和王晉卿送梅花次韻

東坡先生未歸時自種來禽與青李五年不踏江頭路
夢逐東風泛蘋芷江梅山杏為誰容獨笑依依臨野水
此間風物君未識花浪飈天雪相激明年我復在江湖
知君對花三歎息

按未歸時指
在黃州時也

和宋肇遊西池次韻

漢皇慈儉不開邊尚教千艘下瀨船貪看艨艟飛鬪艦
不知鼎鑪舞鈞天故山西望三千里往事回思二十年
自笑區區足官府不如公子散神仙

漢食貨志時粵欲與漢用船戰遂乃大脩昆明池列館
環之治樓船高十餘丈旗幟加其上西京雜記昆明池
中有戈船樓船各數百艘漢武帝紀甲為下瀨將軍注
瀨湍也伍子胥書有下瀨船字吳志周瑜取蒙衝鬪艦
十聯實以薪草同時舉火釋名外狹而長曰艨艟上下
重板曰艦按艨艟蒙衝通吳都賦巨鼉鼎鑪音備戲注
云作力貌西京雜記昆明池刻石為鯨魚每至雷雨魚
嘗鳴吼鬣鬣皆動韓退之詩盧給事詩上界真人足官
府豈如散仙鞭笞鸞
鳳終日相追陪再見

施註蘇詩卷二十六



總校官庶吉士臣張能照

校對官編修臣楊壽楠

謄錄監生臣王泰雲

謄錄監生臣邵士洙

欽定四庫全書薈要

集部

施註蘇詩卷二十七

八

詳校官助教臣常循



欽定四庫全書薈要卷一萬四千九百七十八

集部

施註蘇詩卷二十七

宋蘇軾撰

宋施元之註

武進邵長衡刪補


詩四十五首

時在翰林作

書艾宣畫四首

圖畫見聞志艾宣鍾陵人工畫花竹翎毛

竹鶴

此君何處不相宜况有能言老令威誰識長身古君子

猶將緇布緣深衣

劉禹錫竹詩依依似君子無地不相宜杜子美畫鶴詩
低昂各有意磊落如長人禮記古者深衣蓋有制度以
應規矩準繩權衡故先王貴之今云緇布
緣深衣以鶴之狀身白而黑緣於外也

黃精鹿

太華西南第幾峰落花流水自重重幽人只採黃精去
不見春山鹿養茸

本草黃精一名
鹿竹華山為多

杏花白鵲

天工剪刻為誰妍
抱藥游蜂自作團
把酒惜春都是夢
不如閒客此閒看

韓退之李花詩剪刻作此連天花楊文公談苑李昉畜
五禽皆以客名白鷗曰閑客鷺曰雪客鶴曰仙客孔雀
曰南客鸚鵡曰隴客昉畫為五客圖各為詩五章杜牧之詩願為閑客此閑行

蓮龜

半脫蓮房露壓歌
綠荷深處有遊龜
只應翡翠蘭苔上
獨見玄夫曝日時

抱朴子千歲龜巢如蓮葉杜子美漫興詩或看翡翠蘭
苔上未掣鯨魚碧海中沈懷遠南越志宋元君夢玄衣

大夫神之龜也韓退之詩
再拜謝玄夫收悲以歡欣

僕領貢舉未出錢穆父雪中作詩見及三月二
十日同游金明池始見其詩次韻為答

雪知我出已全消花待君來未敢飄行避門生時小飲
忽逢騎吏有嘉招魚龍絕技來千里斑白遺民數四朝
知有黃公酒壚在蒼顏華髮自相遙

唐傳記有行行避門生之語漢西域傳贊作漫衍魚龍
角抵之戲以觀視之晉王戎傳嘗經黃公酒壚下顧後
車客曰昔與嵇阮酣暢於此自嵇阮云亡吾為
時之所羈紲今日視之雖近邈若山河再見

次韻子由五月一日同轉對

元祐三年五月一日公以翰林學士

兼侍讀文定以戶部侍郎同對先是公發策試廖正一館職問王莽曹操事侍御史王明叟覲奏論以為非是韓川趙挺之亦攻之公屢疏丐去故詩有憂患半生歸休上策云云結用趙堯事言事官中必有所指也

跪奉新書笏在腰談王正欲伴耕樵晉陽豈為一門事
宣政聊同五月朝憂患半生聯出處歸休上策蚤招要
後生可畏吾衰矣刀筆從來錯料堯

漢揚雄傳士有不談王道者樵夫笑之唐溫大雅傳高祖初大雅與弟彥博對掌華近帝曰我起晉陽為卿一

門耳唐書貞元中詔自今五月一日御宣政殿與文武百僚相見漢周昌傳趙堯為符璽御史趙人方與公謂昌曰君之史趙堯奇士是且代君之位時昌為御史大夫笑曰堯年少刀筆吏耳何至是乎居頃之昌為趙相堯遂代之

韓康公挽辭三首

韓康公名絳字子華已見七卷石淙莊詩注

故國非喬木興王有世臣嗟予後死者猶及老成人德業經文武風流表搢紳空餘行樂地處處泣遺民

晉樂廣傳天下言風流者謂王樂為稱首史記五帝紀薦紳先生難言之徐廣曰薦紳即搢紳也古字假借

再世忠清德三朝翊贊勲功成不歸國就訪敢忘君舊

學嚴詩律餘威靖塞氛何當繼韓奕故吏總能文

王注三朝康公所歷英宗神宗及哲宗也毛詩韓奕尹吉甫美先王也能錫命諸侯按公墓誌知慶州日熟羌據堡為亂公出兵討平之故有餘威靖塞氛句

西第開東閣初筵點後塵笙歌邀白髮燈火樂青春扶路三更罷回頭一夢新賦詩猶墨濕把卷獨沾巾

後漢馬融傳為竇憲作西第頌漢公孫弘傳為相開東閣以延賢人詩小雅賓之初筵左右秩秩張景陽七命余雖不敏請從後塵晉羊曇嘗因石頭大醉扶路唱歌樂見謝安傳

柏石圖詩

并引

陳公弼家藏柏石圖其子慥季常傳寶之東坡居士作詩以為之銘

柏生兩石間天命本如此雖云生之艱與石相終始韓子俯仰人但愛平地美土膏雜糞壤成壤幾何耳君看此槎牙豈有可移理蒼龍轉玉骨黑虎抱金柅畫師亦可人使我毛髮起當年落筆意正欲譏韓子

韓退之詩柏生兩石間萬歲終不大又詩柏移就平地柏有傷根容周易繫於金柅貞吉三國蜀費禕傳來敏曰君信可人必能辦賊

慶源宣義王丈以累舉得官為洪雅主簿雅州
戶掾遇吏民如家人人安樂之既謝事居睂之
青神瑞草橋放懷自得有書來求紅帶既以遺
之且作詩為戲請黃魯直秦少游各為賦一首
為老人光華

青衫半作霜葉枯遇民如兒吏如奴吏民莫作官長看
我是識字耕田夫妻噓兒號刺史怒時有野人來挽須
拂衣自注下下考芋魁飯豆吾豈無歸來瑞草橋邊路

獨游還佩平生壺慈姥巖前自喚渡青衣江畔人爭扶
今年蠶市數州集中有遺民懷袴襦邑中之黔相指似
白髯紅帶老不癯我欲西歸卜鄰舍隔牆拊掌容歌呼
不學山王乘駟馬回頭空指黃公壚

韓退之進學解冬暖而兒號寒年豐而妻號飢按蘇叔
黨作王元直墓表云初季父慶源官於雅州以論事不
合取官長怒謝病去詩中云刺史怒即指此唐陽城傳
為道州刺史當上考功第自署曰撫字心勞催科政拙
考下下芋魁飯豆用漢翟方進傳語屢見杜牧之獨酌
詩獨佩一壺游秋毫太山小慈姥巖青衣江皆在青神
縣成都記蠶叢氏每春勸民農桑但嚮蠶具設之蠶市
又詳一卷和子由蠶市詩注左傳襄十七年宋皇國父

為平公築臺子罕請侯農功之畢築者謳曰澤門之哲
實與我役邑中之黔實慰我心杜預曰子罕黑色而居
邑中韓退之崔十六少府詩賃屋住連牆往來欣莫間
隔牆聞譁呼衆口極鵠雁南史顏延年傳作五君詠以
述竹林七賢山濤王戎以貴顯被黜世說王戎
為尚書令著公服乘軺經黃公酒壚互詳本卷

次韻許沖元送成都高士敦鈴轄

高士敦字仲穆名將瓊之

孫

移中老監本虛名懶作燕山萬里行

公自注余昔與高同使契丹辭免不

行坐看飛鴻迎使節歸來駿馬換傾城高才本不緣勲

闕餘力還思治蜀兵西望雪山烽火盡不妨樽酒寄平

生

漢蘇武傳以父任為郎稍遷至移中廐監漢車千秋傳
無閼閼功勞顏師古曰伐積功也杜子美哀嚴武詩公
來雪山重公
去雪山輕

次前韻送程六表弟

二十四卷有送表弟程六
知楚州詩此詩送漕江西

也

君家兄弟真連璧門十朱輪家萬石竹使猶分刺史符
尚方行賜尚書烏前年持節發倉廩到處賣刀收鹽粟
歸來閉口不論功卻走渡江誰復惜君才不用如澗松

我老得全猶社櫟青衫莫厭百僚底白首上有千薪積
憶昔江湖一釣舟無數雲山供點筆未應便障西風扇
只恐先移北山檄憑君寄謝江南叟念我空見長安日
浮江沂蜀有成言江水在此吾不食

連壁用夏侯湛與潘岳同輿事再見漢楊惲傳家方隆
盛時乘朱輪者十人石奮傳奮及四子皆二千石號萬
石君漢汲黯傳持節發河內倉粟以濟貧民賣刀用漢
龔遂賣刀買犢事禮記祭天地之牛角盬粟漢丙吉傳
絕口不道前恩故朝廷莫能明其功左思詠史傳鬱鬱
澗底松離離山上苗以彼徑寸莖蔭此百尺條世胄躡
高位英俊沈下僚地勢使之然由來非一朝再見莊子
人間世匠石之齊至於曲轅見櫟社樹其大蔽牛絜之

百圍匠伯不顧曰是不材之木也無所可用故能若是之壽杜子美狄明府詩有才無命百僚底漢汲黯傳陸下用羣臣如積薪耳後來者居上障扇用王導事北山孔稚圭文並再見後漢岑彭傳光武曰河水在此吾不言食

和王晉卿題李伯時畫馬

督郵有良馬不為君所奇顧收紙上影駿骨何由歸一朝見紫策蟻封驚肉飛豈惟馬不遇人已半生癡

晉王湛傳兄子濟有從馬絕難乘濟問湛曰叔頗好騎否湛曰亦好之因騎此馬姿容既妙迴策如紫善騎者無以過又濟所乘馬甚愛之湛曰此馬雖快然力薄不堪苦行近見督郵馬當勝但芻秣不至耳濟試之與已

馬等湛又曰此馬任重方知平路無以別也於是當蟻封內試之濟馬果躡而督郵馬如常湛初有識度兄弟宗族皆以為癡濟聞湛剖析玄易微妙有奇趣歎曰家有名士三十年而不知濟之罪也武帝亦以湛為癡嘗調濟曰卿家癡叔死未至是對曰臣叔不癡因稱其美後漢作都夷傳遠夷樂德歌云昌樂肉飛屈伸悉修

送錢穆父出守越州二首

錢穆父名勰事見二十四卷次韻錢穆父

詩穆父以龍圖閣待制權知開封府坐奏獄空不實出知越州時元祐三年九月也

簿書常苦百憂集樽酒今應一笑開
京兆從教思廣漢
會稽聊喜得方回

漢趙廣漢傳為京兆尹廉明威制豪強小民得職百姓追思歌之至今晉郗愔傳字方回遷太常固讓不拜樂

補遠郡出為
會稽內史

若耶谿水雲門寺
賀監荷花空自開
我恨今猶在泥滓
勸君莫棹酒船回

杜子美詩若耶谿雲門寺
吾獨何為在泥滓
李太白對酒憶賀監詩
敕賜鏡湖水為君臺沼榮人亡餘故宅空
有荷花生又重憶賀監詩稽山無賀老卻棹酒船回再見

戲書李伯時畫御馬好頭赤

山西戰馬飢無肉
夜嚼長稽如嚼竹
蹏間三丈是徐行
不信天山有坑谷
豈如廐馬好頭赤
立仗歸來臥斜日

莫教優孟卜葬地厚衣薪槨入銅歷

戰國策秦馬之良探前跌後蹠間三尋騰者不可勝數
再見史記滑稽傳楚莊王欲以大夫禮葬愛馬左右爭
之不可優孟曰以大夫禮葬之薄請以人君禮葬之王
曰寡人之過一至此乎為之奈何孟曰請為大王以櫨
竈為椁銅歷為棺齎以姜棗薦以木蘭祭以粳稻衣以
火光葬之於人腹腸於是王使以馬屬大官詩大雅薪
之槨

送程七表弟知泗州

程七表弟名
之邵字懿叔

江湖不在眼塵土坐滿顏繫舟清洛尾初見淮南山淮
山相媚好曉鏡開煙鬟持此娛使君一笑簿領間使君

如天馬朝燕暮荆蠻時無王良手空老十二閑聊當出
毫末化服狡與頑勿謂無人知古佛臨濤灣一作清灣赤子
視萬類流萍閱人寰但使此可人餘事真茅管

王注泗州大聖塔臨泗水舟人往來與居人祈禱立
應古佛清灣指此可人用桓溫傳經王敦墓語已見

送曹輔赴閩漕

曹輔字子方海陵人元豐間為
郎延路經畧司勾當公事故有

往來戎馬詩成橫槊之句後提點廣西刑獄
先生在惠數有往來書帖元祐黨禍諸賢多
在巡內子方周恤
備至士論與之

曹子本儒俠筆勢翻濤瀾往來戎馬間邊風裂儒冠詩

成橫槩裏楯墨何曾乾一旦事遠游紅塵隔巖灘平生

羊炙口竝

普浪反

海搜鹹酸一從荔支飲

一作食

豈念首霜

繫我亦江海入市朝非所安常恐青霞志坐隨白髮闌
淵明賦歸去談笑便解官今我何為者索身良獨難憑
君問清淮秋水今幾竿我舟何時發霜露日已寒

舊唐書杜甫傳元稹曰建安之後曹氏父子鞍馬間為
文往往橫槩賦詩北史荀濟潁川人與梁武帝為布衣
交而負氣不服謂人曰會楯鼻上磨墨作檄文江文通
恨賦鬱青霞之奇意入修夜之不暘白樂天詩不病何
由索得身

次韻王郎子立風雨有感

王子立名適趙郡臨城人祖忠穆公驥知

樞密院父正路知濮州東坡守徐子立為州學生喜怒不見得喪若一日是有類子由故以其子妻之後子由謫官同其有無講道著書元祐四年卒年三十五

百年一俯仰寒暑相主客稍增裘褐氣已覺團扇厄不
須計榮辱此喪彼有獲我琴終不敗無攫故無醅後生
不自牧呻吟空挾策握苗不待長賣菜苦求益此郎獨
靜退門外無行迹但恐陶淵明每為飢所迫淒風弄衣
結小雪穿門席願君付一笑造物亦戲劇朝來賦雲夢

筆落風雨疾為君裁春衫高會開桂籍

盧諶贈劉琨詩瞻彼日月迅過俯仰攬醒用史記鄒忌
子語再見莊子列御寇鄭人緩也呻吟裘氏之地祗三
年而緩為儒又駢拇篇問臧奚事則挾策讀書皇甫謐
高士傳司徒侯霸遣侯子道奉書嚴光子道求報光口
授之使者嫌少可更足之光曰賣菜乎求益也唐房玄
齡傳高孝基曰僕觀人多矣未見有如此郎者陶淵明
歸去來引余家貧耕植不足以自給兼雅子盈室餅無
儲粟家叔以余貧苦遂見用為邑少日眷然有歸歟之
情何則飢凍雖切違已交病荀子鷄衣百結如懸漢司
馬相如賦楚有七澤其一曰雲夢再見杜子美寄李白
詩筆落驚風雨
詩成泣鬼神

次韻黃魯直嘲小德小德魯直子其母微故其

詩云解著潛夫論不妨無外家

後漢王符傳符無外家隱居著

書譏當時失得號潛夫論

進饌客爭起小兒那可涯莫欺東方星三五自橫斜名駒已汗血老蚌空泥沙但使伯仁長還興絡秀家

晉裴秀傳母賤嫡母宣氏不之禮嘗使進饌於客見者皆為之起秀母曰微賤如此當應為小兒故也毛詩小星惠及下也夫人無妒忌之行惠及賤妾進御於君知其命有貴賤能盡其心矣其詩曰嘒彼小星三五在東注云嘒微貌小星衆無名者三心五噉四時再見三輔決錄孔融見韋元將與其父書曰不意明珠生於老蚌蔡邕青衣賦金生砂礫珠出蚌泥歎此窈窕產於卑微列女傳周顗母李氏字絡秀嘗謂顗曰我屈節為汝家

妾門戶計耳汝不與我家為親親者吾亦何惜餘年顓從命由是李氏遂得為方雅之族顓字伯仁

書林次中所得李伯時歸去來陽關二圖後次

中名旦時為右司郎中伯時號龍眠居士

不見何戡唱渭城舊人空數米嘉榮龍眠獨識殷勤處
畫出陽關意外聲

劉禹錫贈米嘉榮詩唱得陽關意外聲舊人惟數米嘉榮又歸京聞何戡歌舊人惟有何戡在更與殷勤唱渭城嘉榮戡元和樂人也本事詩與盧氏雜說小異

兩本新圖寶墨香樽前獨唱小秦王為君翻作歸來引

不學陽關空斷腸

曲譜小秦王入腔即陽關也按先生有歸去來引傳於世亦名哨遍

送蹇道士歸廬山

物之有知蓋恃息孰居無事使出入心無天游室不空
六鑿相攘婦爭席法師逃入廬山山中無人自往還
往者一空還者失此身正在無還間綿綿不絕微風裏
內外丹成一彈指人間俯仰三千秋騎鶴歸來與子游
莊子外物篇物之有知者恃息其不殷非天之罪又天運篇孰居無事而推行是孰居無事淫樂而勸是孰居

無事而披拂是又天游六鑿屢見又寓言篇其往也舍者避席其反也舍者與之爭席矣無還出楞嚴經再見老子綿綿若存用之不勤按道家以烹鍊金石為外丹龍虎胎息吐故納新為內丹楞嚴經惟以空寂修於滅盡身心乃能度百千劫猶如彈指

臥病逾月請郡不許復直玉堂十一月一日鎖院是日苦寒詔賜官燭法酒書呈同院

微霰疎疎點玉堂
詞頭夜下攬衣忙
分光玉燭星辰爛
拜賜宮壺雨露香
醉眼有花書字大
老人無睡漏聲長
何時卻逐桑榆暖
社酒寒燈樂未央

謝惠連雪詩微霰集密雪下
桑榆暖用薛令之事屢見

送周朝議守漢州

五代孟氏竊據蜀土國用褊狹始有摧茶之法藝祖平蜀

罷去一切橫斂茶遂無禁熙寧初王安石呂
惠卿相繼秉政邊事寔興以財用為急七年
李杞以三司判官提舉成都等路茶事初立
茶法一切禁止民間私買後一歲杞以疾奉
祠都官郎中劉佐繼杞為提舉而益病矣侍
御史周尹言成都府路置場摧買諸州茶盡
以入官最為公私之害初李杞倡行敝法劉
佐攘代其任無他方術惟割剝於下而人不
聊生矣臣受命入蜀乃知為害甚鉅有知彭
州呂陶知蜀州吳司孟等奏可以參驗往者
杞佐繼陳苛法即信用其言今議者條其利
蠹悉昏明白未即采聽乞罷摧茶之法許通

商買賣以安遠方尹還未至都坐是除提點
湖北路刑獄元豐二年四月李稷言自摧茶
法行至元年秋凡一年通計課利已支見在
凡七十六萬緡上批稷能推原法意日就事
功宜速遷擢以勸在位稷自蜀擢陝西轉運
使助成伐夏之役督餉出境從給事中徐禧
城永樂為夏人所圍遂與將士俱沒元祐初
蘇子由在諫省及西掖極論之稍去其害詩
云茶為西南病岷俗
記二李者謂此也

茶為西南病岷俗記二李

公自注謂
杞與稷也

何人折其鋒矯矯

六君子

公自注謂思道與姪正孺張永
徽吳醇翁呂元鈞宋文輔也

君家尤出力流

落初坐此謂當收桑榆華髮看劍履胡為犯雨雪歲晚

行未已念歸誠得計顧自為謀耳吾聞江漢間瘡痍有
未起莫輕龔遂老君王付尺箠召還當有詔挽袖謝鄰
里猶堪作水衡供張園林美

後漢馮異傳異破赤眉光武賜璽書曰始雖垂翅回谿
終能奮翼黽池可謂失之東隅收之桑榆漢龔遂傳宣
帝即位久之渤海盜賊並起上選能治者丞相御史舉
遂為太守時遂年七十餘召見形貌短小宣帝望不副
所聞心內輕焉聞遂對云云甚說至渤海盜賊悉平數
年上徵遂以年老不任公卿拜為水衡都尉水衡典上
禁苑共張宮館為宗廟取牲官職親近上甚重之以官
壽卒後漢鄧禹傳帝敕禹曰赤眉來東吾折捶笞之已
見韓退之送張道士詩豈
無一尺箠為國笞羗夷

木山 并引

吾先君子嘗蓄木山三峰且為之記與詩詩人梅
二丈聖俞見而賦之今三十年矣而猶子千乘又
得五峰益奇因次聖俞韻使并刻之其側

附梅聖俞詩空

山枯楠大蔽牛霹靂夜落魚鳧洲魚鳧水射幾
千秋蠹肌爛髓沙蕩流惟存堅骨蛟龍鏤形侔
三山中雄酋左右兩峰相挾翼尊奉君長無慢
尤蘇夫子見之驚且喜買與谿叟憑貂裘因嗟
大不為梁棟又歎殘不為薪樵雨
侵蘚澀得石瘦宜與夫子歸隱丘

木生不願回萬牛願終天年仆沙洲時來幸逢河伯秋

掀然見怪推不流蓬婆雪嶺巧彫鏤蟄蟲行蟻為豪酋
阿咸大膽忽持去河伯好事不汝尤城中古沼浸坤軸
一林瘦竹吾菟裘二頃良田不難買三年椹木行可櫛
會將白髮對蒼巘魯人不厭東家丘

杜子美古柏行大厦如傾要梁棟萬牛回首丘山重莊
子人間世未終天年而中道夭於斤斧此材之患也杜
軍城早秋詩已收滴博雲間戍更奪蓬婆雪外城蓬婆
雪嶺蜀所近吐蕃之山名行蟻音行列之行又南池詩
安知有蒼池
萬頃浸坤軸

送千乘千能兩姪還鄉

治生不求富讀書不求官譬如飲不醉陶然有餘歡君
看龐德公白首終泥蟠豈無子孫念顧獨遺以安鹿門
上冢回牀下拜龍鸞躬耕竟不起耆舊節獨完念汝少
多難冰雪落綺紈五子如一人奉養真色難烹鷄獨饋
母自饗苜蓿槃口腹雖累人寧我食無肝西來四千里
敝袍不言寒秀眉似我兄亦復心閒寬忽然捨我去歲
晚留餘酸我豈軒冕人青雲意先闌汝歸蒔松菊環以
青琅玕禮陰三年成可以挂吾冠清江入城郭小圃生

微瀾相從結茅舍曝背談金鑒

晉陶侃傳每飲酒有定限常歡有餘而限已滿後漢龐德公事屢見杜子美遣興詩昔者龐德公未嘗入州府襄陽者舊間處士節獨苦後漢郭太傳見陳留茅容異之遂與之言因請寓宿旦日容殺鷄為饌太謂為已設既而以供其母自以草蔬與客同飯太起拜之曰賢哉因勸令學卒以成德後漢閔仲叔客居安邑老病家貧不能得肉日買猪肝一片屠者或不肯與安邑令聞敕吏常給焉仲叔知乃歎曰閔仲叔豈以口腹累安邑耶遂去沛三國志蜀秦宓答王商書云僕得曝背乎隴畝之中誦顏氏之簞瓢詠原憲之蓬戶翰林志翰林院與金鑒殿相接故學士號金鑒

送周正孺知東川

周正孺名尹任御史坐言茶事外補事見本卷送周朝議

詩註後呂微仲丞相典領錄見正儒為御史
日所言事歎曰君子哉斯人也因言於上除
直秘閣在東川人安其
政願復借留詔許之

得郡書生榮還家昔人重而况東西川千騎許上冢里
門下車入父老且驚聳端知何武賢不事長卿寵清時
養材傑杞梓方培擁未應遺合抱取用及把拱如君尚
出麾顧我宜耕壟告歸謝先手求去悔不勇豈云慕廉
退實自知衰冗為君掃棠陰畫像或相踵
公自注蜀中
太守無不畫
像者

韓退之贈崔復州序大丈夫官至刺史亦榮矣後漢岑彭傳南還津鄉有詔過家上冢漢石奮傳少子內史慶醉歸入外門不下車萬石君聞之不食慶肉袒謝請罪萬石君曰內史貴人入閭里中長老皆走匿而內史坐車中自如固當迺謝罷慶後慶及諸子入里門趨至家漢何武傳蜀郡郫縣人也弟顯家有市籍租常不入縣課嗇夫求商捕辱顯家武曰以吾家租賦繇役不為衆先奉公吏不亦宜乎卒白太守召商為吏州里皆服焉長卿寵已見前卷次韻王定國倅揚州詩注左傳襄二十六年如杞梓皮革自楚往也雖楚有材晉實用之韓退之送張道士詩況當營都邑杞梓用不疑顏延年五君詠屢薦不入官一麾乃出守

題李伯時畫趙景仁琴鶴圖二首

趙景仁名屺清獻公之子

已見十五卷詩註

清獻先生無一錢故應琴鶴是家傳誰知默鼓無絃曲
時向珠宮舞幻仙

公撰趙清獻公神道碑云自成都召還上謂公聞卿匹
馬入蜀以一琴一鶴自隨為政簡易亦稱是耶鮑明遠
舞鶴賦偉胎化之仙禽黃庭經閑居
藥珠作七言琴心三疊舞胎仙再見

醜石寒松人易親聊將短曲調長人乘軒故自非明眼
終日傲傲舞纓薪

毛詩屢舞傲傲後漢蔡邕傳吳人有燒桐以爨者邕聞
火烈之聲知其良木因請裁為琴果有美音而其尾猶
焦故時人名
曰焦尾琴

次前韻再送周正孺

東川得望郎坐與西爭重高風傾石室舊學鄙文家

自公

注劉蛻文冢
銘在梓州

蜀人安使君所至野不聳竹馬迎細侯大

錢送劉寵遙知句谿路老稚相扶擁看畫古叢祠百怪

朝幽拱牛頭與兜率雲木蔚堆壠醉鄉追舊游筆陣賈

餘勇聊將詩酒樂一掃簿書冗西風吹好句珠玉本無踵

李義山詩望郎臨古郡華陽國志文翁在蜀立講堂作
石室唐劉蛻文冢銘序云文冢者長沙劉蛻復愚為文
不忍棄其草聚而封之也竹馬後漢郭伋事伋字細侯
已見後漢劉寵傳為會稽太守徵為將作大匠山陰五

六老叟齋百錢以送寵為人選一大錢受之牛頭兜率
梓州二寺老杜皆有詩王績醉鄉記昔黃帝氏嘗獲游
其都阮嗣宗陶淵明十數人並遊於醉鄉沒身不返杜
子美醉歌行筆陣獨掃千人軍左傳成二年欲勇者賈
余餘勇會稽典錄孔融與曹公書云珠玉無蹕而自至
者以人好之也況賢者之有足乎再見韓詩外傳蓋胥
謂平公曰珠出於海玉出於山無足而至
者君好之也士有足而不至者君不好也

書王定國所藏煙江疊嶂圖

公自注王
晉卿畫

江上愁心千疊山浮空積翠如雲煙山耶雲耶遠莫知
煙空雲散山依然但見雨崖蒼蒼暗絕谷中有百道飛
來泉縈林絡石隱復見下赴谷口為奔川川平山開林

麓斷小橋野店依山前行人稍度喬木外漁舟一葉江
吞天使君何從得此本點綴毫末分清妍不知人間何
處有此境徑欲往買二頃田君不見武昌樊口幽絕處
東坡先生留五年春風搖江天漠漠暮雲卷雨山娟娟
丹楓翻鴉伴水宿長松落雪驚醉眠桃花流水在人世
武陵豈必皆神仙江山清空我塵土雖有去路尋無緣
還君此畫三歎息山中故人應有招我歸來篇

唐張說江上愁心賦江上之峻山兮鬱崎嶇而不極雲
為風兮煙為色歛變態兮心不識陶岷詩鴉翻楓葉夕

陽動鷺立蘆花秋水明杜子美詩水宿鳥相呼又禽經云凡禽林曰棲水曰宿韓退之桃花源圖歌神仙有無何渺茫桃源之說誠荒唐世俗那知偽與真至今傳者武陵人陶淵明桃源記武陵人既出詣太守說如此太守即遣人隨往尋遂迷不復得路

次韻王定國會飲清虛堂

王定國名鞏
常通守揚州

何遜揚州又幾年官梅詩興故依然何人可復間季孟
與子不妨中聖賢卜築君方淮上郡歸心我已劍南川
此身正似蠶將老更盡春光一再眠

杜子美詩東閣官梅動詩興還如何遜在揚州按何遜揚州事史傳不載載蜀本杜注已見晉王湛傳武帝問

王濟曰湛誰比濟曰山濤以下魏舒以上湛聞笑曰欲處我以李孟之間乎三國魏徐邈傳醉客以清酒為聖人濁酒為賢人再見九域志成都府劍南西川節度李太白寄二稚子詩吳地桑葉落吳蠶已三眠

興龍節侍宴前一日微雪與子由同訪王定國小飲清虛堂定國出數詩皆佳而五言尤奇子由又言昔與孫巨源同過定國感念存沒悲歎久之夜歸稍醒各賦一篇明日朝中以示定國也

天風淅淅飛玉沙詔恩歸沐休早衙遙知清虛堂裏雪

正似薝蔔林中花出門自笑無所詣呼酒持勸惟君家
踏冰凌兢戰疲馬扣門剝啄驚寒鴉君五字入詩律
欲與六出爭天葩頭風已倩檄手愈背癢卻得仙爪爬
銀鉸瀉油浮螳酒紫盃鋪栗盤龍茶幅巾起作鸛鴒舞
疊鼓誰摻漁陽撾九衢燈火雜夢寐十年聚散空咨嗟
明朝握手殿門外共看銀闕暎晨霞

韓詩外傳凡草木花多五出雪花獨六出酉陽雜俎
子花六出相傳即西域薝蔔花也韓退之出門詩長安
百萬家出門無所之又詩今日到君家呼酒持勸君揚
雄甘泉賦馳閭闔而入凌兢注云寒涼戰栗之處三國

魏王粲傳陳琳嘗草檄呈太祖太祖先苦頭風讀之翕然而起曰此愈我病神仙傳麻姑手似鳥爪蔡經心念背癢時此爪爬大佳王方平知之即鞭之曰麻姑神人汝何忽謂其爪可爬背乎杜牧之讀韓杜集詩杜詩韓筆愁來讀似倩麻姑癢處爬曹植七畧雕觴浮蟻釋名酒有汎齊浮蠃在上汎汎然晉謝尚傳王導有勝會謂尚曰聞能作鸚鵡舞一坐傾想寧有此理不尚曰佳便著衣幘而舞導令坐者撫掌擊節尚俯仰在中旁若無人後漢禰衡傳曹操聞衡善擊鼓召為鼓吏因大會賓客衡為漁陽摻操蹀躞而前容態有異聲節悲壯聽者莫不慷慨史記曰者傳宋忠見賈誼於殿門外乃相引屏語史記封禪書三神山金銀為宮闕楚辭九歌暇將出兮東方竝已見

王晉卿所藏著色山二首

縹緲營丘水墨仙浮空出沒有無間爾來一變風流盡
誰見將軍著色山

畫錄李成營丘人也工山水世號李營丘名畫記李思
訓父子畫稱一時思訓官至左武衛大將軍世言山水
者稱大李將軍小李將軍

犖确何人似退之意行無路欲從誰宿雲解駭晨光漏
獨見山紅澗碧時

韓愈南海神廟碑雲陰解駭日光穿漏又韓詩山石犖
确行徑微黃昏到寺蝙蝠飛又山紅澗碧紛爛熳時見
松檻皆

十圍

次韻黃魯直效進士作歲寒知松栢詩

龍蟄雖高卧鷄鳴不廢時
炎涼徒自變茂悅兩相知
已負棟梁質肯為兒女姿
那憂霜貿貿未喜日遲遲
難與夏蟲語永無秋實悲
誰知此植物亦解秉天彝

陸士衡歎逝賦信松茂而栢悅嗟芝焚而蕙歎韓退之
琴操雪霜貿貿薺麥之茂莊子秋水篇夏蟲不可以語
於冰者篤於時也三國魏邢顥傳採庶子之春華忘家
丞之秋實吳諸葛恪傳注虞喜志林曰樂春藻之繁華
忘秋實之甘口周禮大司徒以土會之法辨五地
之物生一曰山林其動物宜毛物其植物宜阜物

王晉卿作煙江疊嶂圖僕賦詩十四韻晉卿和

之語特奇麗因復次韻不獨紀其詩畫之美亦
為道其出處契濶之故而終之以不忘在莒之
戒亦朋友忠愛之義也

山中舉頭望日邊長安不見空雲煙歸來長安望山上
時移事改應潛然管弦去盡賓客散惟有馬埒編金泉
渥洼故自千里足要飽風雪輕山川屈居華屋啗棗脯
十年俯仰龍旂前卻因瘦病出奇骨鹽車之厄寧非天
風流文采磨不盡水墨自與詩爭妍畫山何必山中人

田歌自古非知田鄭虔三絕君有二筆勢挽回三百年
欲將巖谷亂窈窕睂峰修嫵誇連娟人間何有春一夢
此身將老蠶三眠山中幽絕不可久要作平地家居仙
能令水石長在眼非君好我當誰緣願君終不忘在莒

樂時更賦囚山篇

公自注柳子厚有囚山賦

李太白登鳳凰臺詩總為浮雲能蔽日長安不見使人
愁晉王濟傳性豪侈洛京地貴濟買地為馬埒編錢滿
之時謂為金埒史記滑稽傳楚莊王有愛馬衣以文繡
置之華屋之下席以露牀啗以棗脯杜子美丹青引英
雄割據雖已矣文采風流今尚存唐鄭虔傳嘗自寫其
詩畫以獻玄宗大署其尾曰鄭虔三絕漢外戚傳孝武

李夫人卒上作賦以傷悼曰美連娟以修嫵兮劍向新
序齊桓公與管仲飲管仲上壽曰願君無忘出奔於莒
也臣亦無忘縛束於魯也柳子厚囚山賦聖
日以理分賢日以進誰使山之囚吾兮滔滔

夜直玉堂攜李之儀端叔詩百餘首讀至夜半

書其後

玉堂清冷不成眠伴直難呼孟浩然暫借好詩消永夜
每逢佳處輒參禪愁侵硯滴初含凍喜入燈花欲鬪妍
寄語君家小兒子他時此句一時編

西京雜記漢廣川王去疾好發冢晉靈公冢得玉蟾蜍
一枚大如拳腹空空五合水王取以盛硯滴白樂天劉

白唱和集敎命小姪龜兒編錄成兩卷仍寫二本一付夢得小兒崙郎各令收藏兩家集

范景仁和賜酒燭詩復次韻謝之

公自注時公方進新樂

笙磬分均上下堂游魚舞獸自奔忙朱絃初識孤桐韻

公自注舊樂金石聲高而絲聲微今樂金石與絲聲皆著

玉琯猶聞拒黍香

公自注舊法以

尺生律今以黍定律以律生尺

萬事今方咨伯始一斑我亦媿真長此

生會見三雍就無復遼遼歎未央

尚書疏堂上之樂皆受笙均堂下之樂皆受磬均荀子瓠巴鼓瑟游魚出聽列子瓠巴鼓琴而鳥舞魚躍尚書擊石拊石百獸率舞杜子美石犀行再平水土犀奔忙續仙傳王母獻白玉琯云吹之以和天風尚書大傳亦

云漢律厯志度者本起黃鍾之長以子穀秬黍中者後漢胡廣傳字伯始達練事體明解朝章京師諺曰萬事不理問伯始再見晉王獻之傳觀門生擣菹曰南風不競門生曰此郎亦管中窺豹時見一斑獻之怒曰遠慙荀奉倩近媿劉真長拂衣而去漢河間獻王傳武帝時獻雅樂召對三雍宮後漢儒林傳建武五年修起太學中元元年初建三雍明帝即位親行其禮後漢梁鴻作五噫之歌曰遼遼未央兮噫再見

次韻劉貢父春日賜幡勝

寬詔隨春出內朝三軍喜氣挾狐貂
鏤銀錯落翻斜月剪綵繽紛舞慶霄
臘雪強飛纔到地曉風偷轉不驚條
脫冠徑醉應歸卧便腹從人笑老韶
公自注前一日微雪是日幕次賜酒

後漢侯霸傳每春下寬大之詔奉四時之令皆霸所建也續漢禮儀志立春之日下寬大詔書左傳宣公十二年楚子伐蕭蕭潰申公巫臣曰師人多寒王巡三軍拊勉之三軍之士皆如挾纊撫言短李鎮揚州請章季標賦雪詩云朱門到晚難盈尺盡是三軍喜氣消荆楚歲時紀人日家家剪綵或鏤金箔為人謝宣遠詩慶霄薄汾陽杜子美雪詩南雪不到地鹽鐵論周公之時風不鳴條雨不破塊便腹後漢邊韶事屢見

再和

與君流落偶還朝過眼紛綸七葉貂莫笑華顛飄彩勝
幾人黃壤隔青霄行吟未許窮騷雅坐嘯猶能出教條
記取明年江上郡五更春枕夢春韶

左思詠史詩金張藉舊業七葉珥漢貂漢金日磾傳七
業內侍何其盛也劉向新序齊宣王謂問丘邛曰士亦
華髮墮顛而後可用耳坐嘯後漢成瑨事再見漢黃霸
傳然後為條教置父老師帥伍長班行之於民間梁元
帝纂要春景
曰媚景韶景

葉公秉王仲至見和次韻答之

葉公秉名均時為秘書監王仲

至名欽臣為
秘書少監

袵絺方暑亦堪朝歲晚淒風憶阜貂共喜鵲驚歸禁籞
心知日月在重霄君如老驥初遭絡我似枯桑不受條
強鑷霜須簪綵勝蒼顏得酒尚能韶

漢宣帝紀池籩假與貧民蘇林曰折竹以繩綿連禁籩使人不得往來律名為籩應劭曰籩禁苑也詩國風蠶月條桑鄭氏云條桑枝落之采其葉也

再和

衰遲何幸得同朝溫勁如君合珥貂誰惜異材蒙徑寸
自慙枯枿借凌霄光風泛泛初浮水紅糝離離欲綴條
後日一樽何處共奉常端冕作咸韶

後漢輿服志侍中中常侍武冠加黃金璫附蟬為文貂尾為飾注應劭曰說者以金取堅剛百鍊不耗蟬居高飲潔口在掖下貂內勁悍而外溫潤此因物生義也徑寸用左太冲詠史詩詳見本卷柳宗元與蕭俛書枯枿

腐敗不能生植楚辭招覓光風轉蕙泛崇蘭些韓退之
詩始見洛陽春桃枝綴紅糝漢百官表奉常秦官掌宗
廟禮儀景帝中六年更名太常屬官有大樂等六令禮
記樂記端冕而聽古樂樂緯黃帝樂曰咸池舜曰蕭韶

施註蘇詩卷二十七

欽定四庫全書薈要卷一萬四千九百七十九

集部

施註蘓詩卷二十八

宋 蘇軾 撰

宋 施元之 註

武進邵長蘅刪補

詩五十八首

起在翰林洎元祐已巳出守錢塘作

次韻王晉卿惠花栽栽所寓張退傅第中

坐來念念失前人共向空中寓一塵若問此花誰是主
天教閒客管青春

柳子厚石門長老詩坐來念念非昔人萬遍蓮
華為誰用杜牧之雲谿詩願為閑客此閑行

次韻王晉卿上元侍燕端門

月上九門開星河繞露臺君方枕中夢我亦化人來光

動仙毬縵

音隆

香餘步輦回相從穿萬馬衰病若為陪

漢文帝紀嘗欲作露臺故事上元日端門築露臺高丈
餘優人妓女皆列其上放燈至夜闌綵山上縵下仙毬
妓則聽民縱觀天子乘步輦還內枕中夢用盧生事再
見列子周穆王篇西極之國有化人來居亡幾何謁王
同遊王執化人之祛
騰而上者中天而止

王鄭州挽辭

王鄭州名克臣字子難河南人勲
臣審琦之曾孫祖承衍尚秦賢穆

公主子難第景祐進士仁宗閱其父名謂侍
臣曰賢穆有孫登科可嘉也熙寧中為開封
度支二判官遷鹽鐵副使監安上門鄭俠介
夫以上書直言竄嶺表子難嘗薦俠且饋之
白金坐奪官復為戶部副使以集賢殿修撰
知鄆州河決曹村子難亟築隄城下或曰澶
淵去鄆為遠且州徙於高八十年不知水患
安事此不聽役愈急隄成水大至不沒者財
尺餘復起甬道屬之東平王陵邦人得趨以
避水皆繪奉其像置書褒焉故詩云千里農
桑歌子產子師約習進士英宗求儒生為主
壻乃以師約尚馬故云一時冠蓋慕蕭嵩元
祐四年以龍圖閣直學士
大中大夫卒年七十六

羨君華髮起琳宮
右輔初還鼓角雄
千里農桑歌子產

一時冠蓋慕蕭嵩那知聚散春糧外便有悲歡過隙中

京兆同僚幾人在猶思對桺筆生風

公自注吾為開封府幕與子難同廳

空洞靈章經衆聖集琳宮金母命清歌左傳襄公三十年子產為政三年與人誦之曰我有子弟子產誨之我有田疇子產殖之子產而死誰其嗣之唐蕭嵩傳以太子太師請老而子華為侍郎子衡尚主位三品就養年踰八十士豔其榮莊子逍遙遊適百里者宿春糧又知北遊人生天地間若白駒之過隙忽然而已漢趙廣漢傳為京兆尹見事風生無所迴避

書王定國所藏王晉卿畫著色山二首

先生以詩謫黃

州凡五年王定國輩亦坐累謫監賓州酒稅王晉卿詵為英宗主壻主薨詵徙均州故云

三人俱是
識山人

白髮四老人何曾在商顏
煩君紙上影照我眉中山
中亦何有木老土石頑
正賴天日光澗谷紛爛斑
我心空無物斯文定何閒

一作何足關

君看古井水萬象自往還

漢張良傳注顏師古曰四人即商山四皓也
溝洫志引洛水至商顏下注云商山之顏也

君歸嶺北初逢雪我亦江南五見春
寄語風流王武子
三人俱是識山人

晉王濟傳字武子少有逸才風姿英爽氣
蓋一時王武子尚常山公主以比晉卿也

送呂昌朝知嘉州

不羨三刀夢蜀都聊將八詠寄東吳卧看古佛凌雲閣
敕賜詩人明月湖得句會應緣竹鶴思歸寧復為尊鱸
橫空好在修眉色頭白猶堪乞左符

晉王濬傳夜夢懸三刀於其卧屋梁上須臾又益一刀
覺甚惡之主簿李毅曰三刀為州又益一者明府其臨
益州乎果遷益州刺史婺州圖經八詠樓碑在州南宋
沈約集有東陽八詠嘉州江上有大石佛明月湖在州
治之東韓退之南山詩天宇浮修眉濃綠畫新就漢書
銅虎符注與郡守為符者各分其半右留京師左以與
之

次韻黃魯直寄題郭明父府推潁州西齋二首
樹頭啄木常疑客客去而瞋定不煞脫轄已應生井沫
解衣聊復起庖煙平生詩酒真相汙此去文書恐獨賢
蚤晚西湖映華髮小舟翻動水中天

賈島詩時聞啄木鳥疑是打門僧韓退之剝啄行我不
出應客去而瞋杜子美詩久遭詩酒汙何事忝簪裾詩
小雅我從事獨賢西
湖潁州之西湖也

寂寞東京月旦州德星無復綴珠旒莫嗟平輿去聲空神
物尚有西齋接勝流春夢屢尋湖十頃家書新報橘千

頭雪堂亦有思歸曲為謝平生馬少游

月旦汝南許劭事已見劭傳註云縣有月旦里稽神異苑陳實與子姪造荀爽父子討論于時太史奏德星聚漢志五星如連珠許劭傳劭兄虔亦知名汝南人稱平輿淵有二龍焉太平寰宇記汝南縣有二龍鄉謂許劭許靖橘千頭襄陽李衡事馬少游語在馬援傳竝再見石崇思歸引序困於人間煩黷常思歸而永歎尋覽樂篇有思歸引儻古人之情有同於今故制此曲

次韻秦少章和錢蒙仲

秦少章名覲少游弟錢蒙仲穆父子

碧畦黃隴稻如京歲美人和易得情鑑裏移舟天外思
地中鳴角古來聲山圍故國城空在潮打西陵意未平

二子有如雙白鷺隔江相照雪衣明

詩小雅曾孫之庾如坻如京鄭氏云京高丘也李白詩
人行明鏡中鳥渡屏風裏王羲之曰每過山陰道如明
鏡中行也元微之會稽州宅詩星
河影向簷前落鼓角聲從地下迴

次韻錢越州

錢越州穆父先賦羣字韻詩東坡
次其韻錢又和寄坡復次其韻先

是東坡起流落中掌二制勇於報國不為顧
慮且復疎於言語是時衆賢雖聚本朝而已
有洛黨川黨朔黨之語言路多以謗訕誣之
二聖察其忠蓋不以為臯諸公無以泄其怒
凡所薦引如黃魯直歐陽叔弼王定國秦少
游皆被彈劾無得免者公乃屢章乞去歷辯
謗傷元祐四年三月除龍圖閣學士知杭州
而穆父時以京尹坐奏獄空事守越正言劉

器之謂責之太薄錢與公以氣類厚善故此詩末章云年來齒頰生荆棘習氣因君又一言後又和云欲息波瀾須引去吾儕豈獨在多言意皆有在也

髯尹超然定逸羣南游端為訪雲門謫仙歸侍玉皇桉
老鶴來乘刺史轡已覺簿書哀老子故知籩豆有司存
年來齒頰生荆棘習氣因君又一言

蜀開羽傳諸葛亮答羽書曰孟起黔彭之徒當與益德並驅爭先猶未及髯之絕倫逸羣也羽美鬚髯故亮謂之髯馬超字孟起張飛字益德元微之越州寄白樂天詩我是玉皇香案吏謫居猶得小蓬萊已見白樂天詩老鶴風標不可親後漢馬援為隴西太守輒曰願哀老子使得遨遊再見真詰許遠遊與王羲之書云君侯心

中荆棘交雜華嚴經
斷除一切煩惱習氣

同秦仲二子雨中游寶山

平明已報百吏散半日來陪二子閒立鶴低昂煙雨裏
行人出沒樹林間

去杭州十五年復游西湖用歐陽察判韻

我識南屏金鯽魚重來拊檻散齋餘還從舊社得心印
似省前生覓手書葑合平湖久蕪沒人經豐歲尚凋疎
誰憐寂寞高常侍老去狂歌憶孟諸

高僧傳惠可立雪斷臂求法於達磨達磨曰我法一心
不立文字法師以心契故曰心印王注公游壽星院入
門便悟嘗有詩云前生我已到杭州又晉羊祜自省前
生李氏之子唐房瑄悟前生為永禪師張文定公方平
為滁州日游琅邪山至藏院云前生寫楞伽經未終願
再成之皆異人也唐高適為封丘尉日有詩云我本漁
樵孟諸野一生自是悠悠者乍可狂歌草
澤中寧堪作吏風塵下適終左散騎常侍

與莫同年雨中飲湖上

莫君陳字和中吳興人官至少府監

到處相逢是偶然夢中相對各華顛還來一醉西湖雨
不見跳珠十五年

公為杭州日有詩云黑雲翻墨未遮
山白雨跳珠亂入船故今詩云爾

送子由使契丹

雲海相望寄此身
那因遠適更沾巾
不辭驛騎凌風雪
要使天驕識鳳麟
沙漠回看清禁月
湖山應夢武林春
單于若問君家世
莫道中朝第一人

漢匈奴傳南有大漠北有強胡胡者天之驕子也杭州舊號虎林避唐諱更為武林陸文學錢塘記云武林山隋時有白虎見其上因以名之唐李揆傳帝嘗曰卿門地人物文學皆當時第一信朝廷羽儀後為入蕃使酋長曰聞唐有第一人李揆公是否否揆畏留因給曰彼李揆安肯來耶

次韻答劉景文左藏

劉景文名李孫開封祥符人壯閔公平之少子初以

右班殿直監饒州酒後以左藏副使為兩浙
兵馬都監駐杭州公為守表薦之得隰州以
沒公嘗自書曰劉景文慷慨奇士也博學能
詩英偉冠世孔文舉之流耳嘗寄僕詩云四
海共知霜鬢滿重陽曾插菊花無死之日家
無一錢但有書二萬軸畫數百幅云其愛重
之如此

我老詩壇仆鼓旗借君佳句發良時但空賀監杯中物
莫示孫郎帳下兒夜燭催詩金燼落秋芳壓帽露華滋
故應好語如爬癢有味難名只自知

漢韓信傳建大將鼓旗唐南蠻傳攻大度河仆旗息鼓
李白憶賀監詩昔好杯中物今為松下塵帳下兒用禍

正平譏劉荊州語詳見十二卷次韻答
邦直詩注佛書如人飲水冷暖自知

坐上復借韻送寄嵐軍通判葉朝奉

雲間蹋白看纏旗莫忘西湖把酒時夢裏吳山連越嶠
樽前羌婦雜胡兒夕烽過後人初醉春鴈來時雪未滋
為問從軍真樂否書來麤遣故人知

王注軍中有踏白馬行師以為先驅蹋白纏旗蓋寄嵐
邊州所見也杜子美夕烽詩夕烽來不近每日報平安
王仲宣從軍詩從軍
有苦樂但問所從誰

始於文登海上得白石數升如芡實可作枕聞

梅丈嗜石故以遺其子子明學士子明有詩次

其韻

梅子明吳郡人自館閣求便親養為杭州通判

海隅荒怪有誰珍零落珊瑚泣季倫法供坐令微物重
色難歸致孝心純只疑薏苡來交趾未信蠙珠出泗濱
願子聚為江夏枕不勞揮扇自寧親

晉石崇傳字季倫與王愷以奢靡相尚武帝助愷以珊瑚樹高二尺許以示崇崇以鐵如意擊碎之愷為之惋
惜崇曰不足多恨乃命左右悉取珊瑚高三四尺者六七株如愷比者甚衆愷怵然自失華嚴經諸供養中法
供養最先生舊有怪石供故云薏苡用馬援交趾事再
見尚書泗濱浮磬淮夷蠙珠暨魚東觀漢記黃香至孝

事母暑月扇枕寒則以身溫席人號江夏黃童

次韻錢越州見寄

莫將牛弩射羊羣臥治何妨晝掩門
稍喜使君無疾病時因送客見車轡
搔頭白髮秋無數閉眼丹田夜自存
欲息波瀾須引去吾儕豈獨坐多言

王注漢有八牛弩以射楚軍矢及十里黃庭經噓吸廬
外出入丹田注存三丹田使和積如一則曰胎仙韓退
之剝啄行凡今之人急名與官子不引去與為波瀾

文登蓬萊閣下石壁千丈為海浪所戰時有碎

裂洵灑歲久皆圓熟可愛土人謂此彈子渦也
取數百枚以養石菖蒲且作詩遺垂慈堂老人
蓬萊海上峯玉立色不改孤根捍滔天雲骨有破碎陽
侯殺蘆角陰火發光采累累彈丸間瑣細或珠琲閭浮
一漚耳真妄果安在我持此石歸袖中有東海垂慈老
人眼俯仰了大塊置之盆盎中日與山海對明年菖蒲
根連絡不可解儻有蟠桃生旦暮猶可待

木玄虛海賦陰火潛然劉禹錫賦發陰火之光采左太
沖吳都賦金鑑磊砢珠琲闌干長阿含經閭浮提世界

由閭浮提樹得名楞嚴經空生
大覺中如海一漚發再見本卷

次韻毛滂法曹感雨

毛滂字澤民元祐初公在翰苑澤民自浙入京以書

贊文一編自通公出守錢塘澤民適為掾紹聖初謫惠州澤民以書問安否又寄所擬秋興賦公答之曰秋興之作追配騷人多矣遇不遇自有定數然非厄窮無聊何以發此奇思以自表於世耶澤民嘗為武康令崇寧初除刑定官未幾為言者論去後知秀州有東堂集行於世

江南佳公子遺我錦繡端攬之溫如春公子焉得寒興
雨自有時膚寸便蒙霞歛藏以自潤牛斗何足干空庭

月與影強結三友歡我豈不足歟要此清團團欲歡在
一醉常恐樽中乾捨酒尚可樂明珠如彈丸但恐千仞
雀怱怱發虛彈迨子閒暇時種子田中丹一朝涉世故
空腹容欺謾我頃在東坡秋菊為夕飡永愧坡間人布
褐為我完雪堂初覆瓦上簞無下莞時時亦設客每醉
筒輒殫一笑便傾倒五年得輕安公子豈我徒衣鉢傳
一簞定非郊與島筆勢江河寬悲吟古寺中穿帷雪漫
漫他年記此味芋火對懶殘

張平子四愁詩美人贈我錦繡段何以報之青玉案公
羊傳觸石而出膚寸而合不崇朝而徧雨乎天下者惟
泰山雲爾南史王筠傳好詩圓美流轉如彈丸再見莊
子讓王篇以隋侯之珠彈千仞之雀世必笑之以其所
用重而所要輕也黃庭經注寸田謂三丹田皆方一寸
毛詩下莞上蕀乃安斯寢公答秦太虛書初到黃廩入
既絕人口不少私甚憂之但痛自節儉日用不過百五
十每月朔便取四千五百錢斷為三十塊挂屋梁上平
旦用畫叉挑取一塊即藏去又仍以大竹筒別貯用不
盡者以待賓客此賈耘老法也楞嚴經心悟實相身意
輕安撫言唐進士如得主司或與主司先人同名第即
謝衣鉢古詩話和凝第十三名及第復知舉取范質第
十三名謂曰此傳老夫衣鉢耳郊島皆韓愈門人公蓋
以韓自況也袁郊甘澤謠衡岳寺有僧執役性懶而食
殘號懶殘李泌嘗異之一日往見正撥火出芋
啖之取其半以授泌曰勿多言領取十年宰相

送鄧宗古還鄉

廣漢有姜子孝悌行里閭赤睂雖豺虎弛兵過其墟至
今空清泉無復雙鯉魚南鄭有李劬得妙甘公書夜坐
指流星驚倒兩使車抱關不肯仕布褐蒙璠璣西南固
多士君得二子餘凜凜忠文公搜士及樵漁澗谿有幽
討蘋芷真嘉蔬歲晚終不食心惻當何如

後漢列女傳姜詩事母孝母嗜江水魚膾夫婦常力作
供之舍側忽有涌泉每旦輒出雙鯉以供膳赤睂賊經
詩里弛兵而過曰驚大孝必觸鬼神又互見十八卷五
禽言詩注後漢李劬傳漢中南鄭人也善河圖風星和

帝遣使微服單行觀采風謠二使當到益部投命候舍
命時為幙門候吏夏夜露坐因仰觀問曰二君發京師
時寧知朝廷遣使耶二人相驚視曰不聞也問何以知
之命指星云二使星向益州分野故知之後三年其使
者一人拜漢中太守命猶為吏太守奇其隱德召署戶
曹史甘公古之知星者忠文范蜀公也蜀公諱鎮字景
仁薨謚忠文宗古
當是景仁門生

參寥上人初得智果院會者十六人分韻賦詩

得心字

參寥上人名道潛事見十五卷智果舍
下有泉出石間東坡名之參寥泉且為

之銘故
詩云云

漲水返舊壑飛雲思故岑念君忘家客亦有懷歸心三

閒得幽寂數步藏清深攢金盧橘塢散火楊梅林茶笋
盡禪味松杉真法音雲崖有淺井玉醴常半尋遂名參
寥泉可濯幽人襟相攜橫嶺上未覺衰年侵一眼吞江
湖萬象涵古今願君更小築歲晚解我簪

楊雄太玄經飲玉醴以解渴張
平子思玄賦飲青岑之玉醴

哭王子立次兒子迨韻

王子立名適事見上卷
次韻王郎子立風雨有

感詩
註

彭城初識子照眼白而長異夢成先兆

公自注余為密
州子立未嘗相

識忽告同舍生曰吾夢為密州壻清言得未嘗豈惟知何也已而果以子由之子妻之

禮意遂欲補詩亡

公自注子立能詩而有禮學

咄咄真相逼諸生敢

鴈行

韓退之銘吾見其孫白而長身再見晉東哲有補亡詩其序曰哲與同業疇人肆修鄉飲酒之禮然所詠之詩或有義無辭音樂取節闕而不備於是遙想既往存思在昔補著其文以綴舊制法帖衛夫人書王逸少甚能學衛真書咄咄逼人筆勢洞精字體道媚

非無伯鸞志獨有子雲悲

公志子立藝享年三十五一女初晬有遺腹裔其兄蘧子

開葬之臨城

恨子非天合猶能使我思兒曹莫悽慟老眼欲

枯姜會哭皆豪傑

公自注子立與黃魯直張文潛
晁無咎秦少游陳無已皆友善誰為

感舊詩

後漢梁鴻傳字伯鸞家貧而尚節介鄉里勢家慕之多
欲女之鴻並絕不娶同縣孟氏女狀醜肥而黑擇對不
嫁鴻聞而聘之共入霸陵山中以耕織為業詠詩書彈
琴以自娛仰慕前世高士而作頌揚子法言育而不苗
者吾家之童烏乎注云童烏子雲
之子也子雲傷童烏育而不苗也

龍困嘗魚服羊僇或虎蒙
怱怱成鬼錄憤憤到天公
偶落藩牆上同遊羿彀中
回看十年事黃葉卷秋風

張平子東京賦白龍魚服見困豫且揚子羊質而虎皮
見草而悅見豺而戰忘其皮之虎也魏文帝與吳質書

徐陳應劉一時俱逝撰其遺文都為一集觀其姓名已為鬼錄晉天文志康帝建元二年歲星犯天關安西將軍庾翼與兄冰書曰歲星犯天關占云關梁當分比來江東無他故江道亦不艱難而石季龍頻年再閉關不通信使此復是天公憤憤無皂白之證也庾信詩憤憤天公曉精神殊乏少藩牆用范縝對景陵王人生如樹花同發隨風而墮語羿穀用莊子德充符語並已見

異鵲

并引

熙寧中柯侯仲常通守漳州以救饑得民有二鵲栖其聽事訖侯之去鵲亦送之漳人異焉為賦此詩

昔我先君子仁孝行於家家有五畝園么鳳集桐花是
時烏與鵲巢穀可俯拏憶我與諸兒飼食觀羣呀里人
驚瑞異野老笑而嗟云此方乳哺甚畏鳶與蛇手足之
所及二物不敢加主人若可信衆鳥不我遐故知中孚
化可及魚與鰕柯侯古循吏惻惻真無華臨漳所全活
數等江干沙仁心格異族兩鵲栖其衙但恨不能言相
對空楂楂善惡以類應古語良非夸君看彼酷吏所至
號鬼車

荀子王者之政好生惡殺則鳥鵲之巢可俯而窺莊子
馬蹏篇至德之世禽獸可係羈而遊鳥鵲之巢可攀援
而窺周易中孚信及豚魚吉東坡雜說少年時所居書
室前有竹柏雜花叢生滿庭衆鳥巢其上武陽君惡殺
生兒童婢僕皆不得捕取數年間鳥雀皆巢於低枝其
鶯可俯而窺也又有桐花鳳四五日一翔集其間此鳥
羽毛至為奇異難見而能馴擾殊不畏人間里間見之
以為異事此無他不忤之誠信於異類也有野老言鳥
雀去人太遠則其子有蛇鼠狐狸鴟雀之憂人既不殺
則自近人蓋欲免此害也由是觀之異時鳥雀巢不敢
近人者以人為甚於蛇鼠之類也苛政猛於虎信哉後
漢章帝紀元和元年詔曰安靜之吏悃悃無華難退之
雜詩鵲鳴聲楂楂鳥噪聲攬攬嶺表錄異鳥一名鬼車
或云九首古者重鴉肉及梟羹蓋惡鳥欲滅其族也

次韻詹適宣德小飲巽亭

君方夢謫仙

公自注來詩記李白郎官湖事

我亦弔文園江上同三黜

天涯共一樽濤雷殷白晝梅雪耿黃昏歸去多情雨應

隨御史軒

公自注詹為御史臺主簿

金道真浙江記潮頭湧激高數丈勾隱若雷霆林逋梅詩暗香浮動月黃昏唐顏真卿傳為監察御史使河隴時五原有冤獄久不決天且旱真卿辨獄而雨郡人呼為御史雨韓退之祈雨詩行看五馬入蕭颯已隨軒

東川清絲寄魯冀州戲贈

魯冀州名有開字元翰事見第十二卷送

元翰如衛州詩註

鵝谿清絲清如冰上有千歲交枝藤藤生谷底飽風雪

歲晚忽作龍蛇升嗟我雖為老侍從骨寒只受布與繒
牀頭錦衾未還客坐覺芒刺在背膺豈如髯卿晚乃貴
福祿正似川方增醉中倒著紫綺裘下有半臂出縹綾
封題不敢妄裁剪刀尺自有佳人能遙知千騎出清曉
積雪未放浮塵興白須紅帶柳絲下老弱空巷人相登
但放奇紋出領袖吾髯雖老無人憎

杜子美張舍人遺禱段詩錦鯨卷還客始覺心和平漢
霍光傳上內嚴憚之若有芒刺在背李白鬣月詩序翫
月金陵城西孫楚樓日晚乘醉著紫綺裘烏紗帽與酒
客數人棹歌秦淮北夢瑣言鄭愚好華侈以錦為半臂

後以所業見崔鉉鉉歎曰真消得錦半臂宣室志竇參
夢德宗以文錦半臂賜之解者曰半臂乃股肱之服後
數日果大拜溫庭筠乾膜子房瑄家法不著
半臂韓退之詩我齒豁可鄙我顏老可憎

怡然以垂雲新茶見餉報以大龍團仍戲作小

詩

妙供來香積珍烹具大官揀牙分雀舌賜茗出龍團曉
日雲菴暖春風浴殿寒聊將試道眼莫作兩般看

維摩經香積如來以衆香鉢盛滿香飯與化菩薩唐百
官志太官署令掌供祠宴朝會膳食呂仲吉建安茶錄
芽如鷹爪雀舌者為
上一槍一旗次之

次韻王忠玉游虎丘三首

當年大白此相浮老守娛賓得二丘

公自注郡人有閭丘公太守王規父

嘗云不謁虎丘即謁閭丘規父忠玉伯父也

白髮重來故人盡空餘叢桂小

山幽

楚辭劉安招隱士序曰淮南小山之所作也辭曰桂樹叢生兮山之幽

青蓋紅旗暎玉山新詩小草落玄泉風流使者人爭看

知有真娘立道邊

公自注虎丘中路有真娘墓

張王于東京賦陰地幽流玄泉冽清孟東野詩手中飛黑電象外寫玄泉

舞衫歌扇轉頭空只有青山杳靄中若共吳王闕百草
使君未敢借驚鴻

劉禹錫寄蘇州白使君詩若共吳王闕百草不知應是
欠西施又秦娘歌舞鶴驚鴻水榭春歌撩上客蘭堂暮

寄蔡子華

蔡子華名褒著之青神人成都帖有
詩叙云王十六秀才將歸蜀云子華

宣德蔡文見託求詩夢中為作四句覺而成
之以寄子華仍請以示楊君素王慶源二老

人元祐五年

二月七日

故人送我東來時手栽荔子待君歸荔子已丹吾髮白
猶作江南未歸客江南春盡水如天腸斷西湖春水船

想見青衣江畔路白魚紫笋不論錢霜髯三老如霜檜
舊交零落今誰輩莫從唐舉問封侯但遣麻姑更爬背
史記蔡澤傳嘗從唐舉相舉熟視而笑曰吾聞聖人不
相殆先生乎澤知舉戲之乃曰富貴吾所自有所不知
也者壽

和錢四寄其弟蘇

錢四蓋穆父蘇字出仲時穆父守越公守杭故云東西二

老人別本又載一篇云老來日月似車輪此
去知逢幾箇春昨夜冰花猶作柱曉來梅子
已生
人

再見濤頭湧玉輪煩君久駐浙江春年來總作維摩病

堪笑東西二老人

維摩經長者維摩詰以方便現身有疾以其疾故
無數千人皆往問疾維摩詰因以身疾廣為說法

臥病彌月聞垂雲花開順閣黎以詩見招次韻

答之

道人心似水不礙照花妍宴坐春強半清陰月屢遷平
生無起滅一念有陳鮮嫋嫋風枝舉離離日萼薦病吟
終少味老醉不成顛何必遨頭出湖中有散仙

李義山詩日薄不薦花後漢馬援傳過是欲少味矣成
都記太守凡出遊樂士女列於木牀觀之勢如磴道謂

之遊牀故謂
太守為遊頭

故周茂叔先生濂溪

周茂叔先生子燾字次元公守杭次元為兩浙轉運

同在錢塘為賦此詩
次元終寶文閣待制

世俗眩名實至人疑有無怒移水中蟹愛及屋上鳥坐
令此谿水名與先生俱先生本全德廉退乃一隅因拋
彭澤米偶似西山夫遂即世所知以為谿之呼先生豈
我輩造物乃其徒應同柳州柳聊使愚谿愚

晉解系傳趙王倫以宿憾收系曰我於水中見蟹且惡
之況此人兄弟輕我耶太公虎韜篇愛其人者愛及屋

上之烏憎其人者憎其餘胥再見揚子或問子蜀人也
請人曰李仲元者人也不夷不惠可否之間也如是則
其名之不彰曰無仲尼則西山之餓夫與東國之絀臣
惡乎聞柳子厚種柳詩柳州柳刺史種柳柳江邊又愚
溪詩序余以愚觸罪謫瀟水上愛是谿故更名為愚溪

次韻子由使契丹至涿州見寄四首

老人癡鈍已逃寒子復辭行理亦難

公自注余昔年辭免使北

要到

盧龍看古塞投文易水弔燕丹

唐地里志平州武德元年徙治盧龍一曰盧龍軍天寶
二載置史記燕世家秦兵臨易水燕知禍且至太子丹
使荊軻襲刺秦王秦王殺軻擊燕燕斬丹以獻

胡羊代馬得安眠窮髮之南共一天又見子卿持漢節
遙知遺老泣山前

莊子逍遙游窮髮之北有冥海者天池也李潤詩島嶼
分諸國星河共一天韓退之和連昌宮詩宮前遺老來
相問今是開元幾葉孫李太白金陵詩六帝餘古丘樵蘇泣遺老

羶毳年來亦甚都時時鳩舌問三蘇

公自注余與子由
入京時北使已問

所在後余館伴北
使屢誦三蘇文

那知老病渾無用欲問君王乞鏡湖

始憶庚寅降屈原旋看蠟鳳戲僧虔隨翁萬里心如鐵

公自注時猶
子遲待行

此子何勞為買田

楚辭離騷攝提貞于孟陬兮惟庚寅吾以降南史王僧虔傳父曇首與兄弟集會子孫任其戲適僧虔採蠟燭珠為鳳凰伯父弘稱其長者或云僧綽漢陸賈使南越歸出橐中金分諸子買好時田宅

雪後便欲與同僚尋春一病彌月雜花都盡獨
牡丹在耳劉景文左藏和順闍黎詩見贈次韻

答之

殘花怨久病剩雨泣餘妍不見雙旌出空令九陌遷

自公

注開園時
市井皆入

知君苦寂寞妙語嚼芳鮮淺紫從爭發深紅

任蚤薦天葩尚青萼國色待華顛載酒邀詩將臞儒不

是仙

次韻劉景文周次元寒食同游西湖

絮飛春減不成年老境同乘下瀨船藍尾忽驚新火後

遨頭要及浣花前

公自注成都太守自正月二日出遊謂之遨頭至四月十九日浣花乃止

山西老將詩無敵洛下書生語更妍共向北山尋二士

畫橈鼉鼓聒清眠

漢武帝紀元鼎五年下瀨將軍下蒼梧臣瓚曰伍子胥書有下瀨船白樂天寒食詩三杯藍尾酒一櫟膠牙錫咸鎬故事清明尚食內園官小兒於殿前鑽新火賜宰臣以下漢趙充國傳贊曰秦漢以來山東出相山西出

將杜子美贈李白詩白也詩無敵晉謝安傳能為洛下書生詠維摩經二士共談必說妙法二士謂清順道潛連日與王忠玉張全翁游西湖訪北山清順道潛二詩僧登垂雲亭飲參寥泉最後過唐州陳使君夜飲忠玉有詩次韻答之

北山非自高千仞付我足西湖亦何有萬象生我目雲深人在塢風靜響應谷與君皆無心信步行看竹竹間逢詩鳴眼色奪湖淥百篇成俯仰二老相追逐故應千頃池養此一雙鵠山高路已斷亭小膝屢促夜尋三尺

井渴飲半甌玉明朝鬧絲管寒食雜歌哭使君坐無聊
狂客來不速載酒有鴟夷扣門非啄木浮蛆灑金盃翠
羽出華屋湏臾便陳跡覺夢那可續及君未渡江過我
勤秉燭一笑換人爵百年終鬼錄

韓退之送孟東野序東野始
以其詩鳴今以言二詩僧也

新茶送簽判程朝奉以餽其母有詩相謝次韻

答之

程朝奉名遵彥字之邵舉進士簽書杭州
節度判官文學吏事皆有可觀事母孝謹

有絕人者在東坡幕府二年替還有詩送赴
闕載二十九卷公再入翰林薦之於朝擢宗

正丞後使廣西入為祠
部郎提點兩浙刑獄

縫衣付與溧陽尉舍肉懷歸潁谷封聞道平反供一笑
會須難老待千鍾火前試焙分新勝雪裏頭綢輟賜龍
從此升堂是兄弟一甌林下記相逢

孟東野游子吟慈母手中線遊子身上衣臨行密密縫
意恐遲遲歸唐孟郊傳字東野年五十登進士第調溧
陽尉左傳隱公元年潁谷封人潁考叔有獻於鄭莊公
公賜之食食舍肉公問之對曰小人有母未嘗君之羹
請以遺之漢雋不疑傳為京兆尹每行縣錄決囚徒還
其母輒問有所平反活幾人即多有所平反母喜笑
為飲食語言異於他時毛詩既飲旨酒永錫難老魯侯
宴喜令妻壽母莊子寓言篇曾子再仕而心再化曰吾

及親仕三釜而心樂後仕三千鍾不洎吾心悲茶錄福
建貢茶每若干計綱以進國朝故事第一綱團茶至即
分賜近臣歐陽公歸田錄茶之貴者莫如龍鳳三國吳
周瑜傳孫策與瑜同年獨相友善升堂拜母有無通共
張昭傳孫策創業命昭為長
史升堂拜母如比肩之舊

次韻送張山人歸彭城

羨君飄蕩一虛舟來作錢塘十日遊水洗禪心都眼淨
山供詩筆總看愁雪中乘興真聊爾春盡思歸卻罷休
何日五湖從范蠡種魚萬尾橘千頭

莊子列禦寇汎若不繫之舟虛而遨遊者也北戶雜錄
陶朱公養魚法凡種魚每二月上庚日取鯉魚有子者

投池中柳子厚遊黃溪
記有魚數千尾橘千頭

次韻林子中王彥祖唱酬

林子中名希時守潤
故有雨餘北固之句

蚤知身寄一漚中晚節尤驚落木風

公自注近聞莘老
公擇皆逝故有此

句昨夢已論三世事歲寒猶喜五人同

公自注余與子
中彥祖子敦完

夫同試舉人景
德寺今皆健

雨餘北固山圍坐春盡西湖水暎空差

勝四明狂監在更將老眼犯塵紅

楞嚴經空生大覺中如海一漚發有漏微塵國皆因空
所生圓覺經如昨夢故當知生死及與涅槃無起無滅
無去來今南史梁平樂侯傳京城之西有別嶺入江高
數十丈三面臨水號曰北固蔡謨起樓其上以置軍實

唐賀知章傳晚節尤誕放自號四明狂客及秘書外監

壽星院寒碧軒

周益公詩話云蘇文忠公詩初若豪邁天成其實闕鍵甚密再

來杭州作壽星院寒碧軒詩句句切題而未嘗拘其云清風肅肅搖牕扉牕前脩竹一尺圍紛紛蒼雪落夏簟冉冉綠霧沾人衣寒碧各在其中第五句日高山蟬抱葉響頗似無意而杜詩云抱葉寒蟬靜併葉言之寒碧亦在其中矣人靜翠羽穿林飛固不待言末句卻說破其妙如此

清風肅肅搖牕扉
牕前修竹一尺圍
紛紛蒼雪落夏簟
冉冉綠霧霑人衣
日高山蟬抱葉響
人靜翠羽穿林飛

道人絕粒對寒碧為問鶴骨何緣肥

書劉景文左藏所藏王子敬帖

章子厚書評云劉季孫文思有

子敬兩帖二十二字雖殘缺不完而精神骨氣具在柳公權題數十字於其後用筆艱辛滯澀不可言米元章書史云王獻之送黎帖云今送黎三百顆晚雪殊不能佳即詩中所謂君家兩行十二字也宿按此詩注有東坡詩話所載子敬黃甘三百顆帖在劉景文處二王書傳於世者皆無黃甘帖獨書史載唐摹逸少帖乃雙鉤蠟紙本云奉橘三百顆霜未降未可多得詩話所載蓋誤記黎為甘也

家雞野鷺同登俎春蚓秋蛇總入奩君家兩行十二字

氣壓鄴侯三萬籤

書劉景文所藏宗少文一筆畫

張彥遠名畫記宗炳字少文南

陽沮陽人善書畫郭若虛圖畫見聞志張彥
賓稱惟王獻之能為一筆書陸探微能為一

筆
畫

宛轉回紋錦紫盈連理花何須郭忠恕匹素畫縑車

郭若虛圖畫見聞志郭忠恕字恕先雒陽人善畫有設
統素求為圖畫者必怒而去乘興即自為之有富人子
喜畫設几案粉墨絹素屢以情言忠恕取紙數十番首
畫一丁角小童持車輪紙窮處作風鳶中引線長數丈
富家子大
怒遂謝絕

真覺院有洛花花時不暇往四月十八日與劉

景文同往賞枇杷

綠暗初迎夏紅殘不及春
魏花非老伴盧橘是鄉人
井落依山盡巖崖發興新
歲寒君記取松雪看蒼鱗

歐陽公花釋名牡丹中魏花者千葉內紅出於魏仁浦
故相家白樂天醉贈叔詩老伴如君少史記司馬相如
傳盧橘夏熟注今蜀中有給客橙
即盧橘也談助云盧橘枇杷也

又和景文韻

牡丹松檜一時栽付與春風自在開
試問壁間題字客

幾人不為看花來

西湖壽星院此君軒

臥聽謾謾碎龍鱗
俯看蒼蒼立玉身
一舸鷗夷江海去
尚餘君子六千人

陸機感冬賦風謾謾而屢作世說世目李元禮謾謾如
勁松下風再見白樂天題武丘詩玉立竹森森史記越
王句踐世家用范蠡計發習流二千教士四萬君子六
千人諸御千人伐吳句踐已平吳范蠡乃與其私徒屬
乘舟浮海出齊變姓
名自謂鷗夷子皮

仲天貺王元直自谿山來見余錢塘留半歲既

行作絕句五首送之

王歲字元直公夫人同安君之弟也

仲君豈弟多學王子清修寡言病後空驚鶴瘦時來或作鵬騫

海角煩君遠訪江源與我同來剩作數詩相送莫教萬里空回

郭景純江賦惟岷山之導江初發源乎濫觴

三人一旦同行

公自注二子與秦少章同寓高齋復同舟北行

留下高齋月明

遙想扁舟京口尚餘孤枕潮聲

更欲留君久住念君去國彌年空使犀顱玉頰長懷髯
舅淒然

犀顱玉頰公自謂
諸子髯舅謂元直

為余遠致殷勤瑞草橋邊老人紅帶雅宜華髮白醪光
泛新春

老人王慶源也公先
有慶源詩引見上卷

贈善相程傑

心傳異學不謀身自要清時閱搢紳火色上騰雖有數

急流勇退豈無人書中苦覓元非訣醉裏微言卻近真
我似樂天君記取華顛賞遍洛陽春

唐馬周傳岑文本謂所親曰馬君鳶肩火色騰上必速
恐不能久江鄰幾雜志錢若水謁華山陳搏搏曰目如
點漆黑白分明當作神仙有紫閣老僧曰不然他日但
貴急流中勇退耳白樂天醉吟先生傳洛陽內外
十里間觀寺丘壑有泉石花竹者靡不遊
吟詩看雪尋花翫風月洛陽城裏七年閑

施註蘇詩卷二十八



總校官庶吉士臣張能照

校對官編修臣楊壽楠

膳錄監生臣邵士洙

膳錄監生臣鍾浩